

Ўзбекистон Республикаси Президентининг Қарори

ҚУРБОН ҲАЙИТИНИ НИШОНЛАШ ТҮФРИСИДА

Муборак Қурбон ҳайитининг халқимиз маънавий ҳаётидаги ўрни ва аҳамиятини эътиборга олиб ҳамда Ўзбекистон Республикаси Президентининг «Диний байрам – Қурбон ҳайитини дам олиш куни деб эълон қилиш ҳақида»ги 1991 йил 20 июнданги ПФ-221-сон Фармонига мувофиқ:

1. 2007 йилда Қурбон ҳайитининг биринчи куни 19 декабрга тўғри келиши ҳақида Ўзбекистон мусулмонлари идораси мурожаатини инобатга олиб, 2007 йил 19 декабрь дам олиш куни деб белгилансин ва мамлакатимизда байрам сифатида кенг нишонлансан.

2. Республика «Нуроний», «Маҳалла» жамғармалари, «Камолот» ёшлар ижти-

моий ҳаракати ва бошқа барча мутасадди идора ва жамоат ташкилотлари Қурбон ҳайитининг жойларда тартибли ва юқори даражада, халқимизнинг миллий қадриятларига мос равишда ўтиши учун тегишли тадбирларни амалга оширсин.

3. Ўзбекистон Миллий телерадиокомпанияси, Ўзбекистон Миллий ахборот агентлиги ва бошқа оммавий ахборот воситаларига Қурбон ҳайитини нишонлаш билан боғлиқ тадбирларни кенг ёритиш тавсия этилсин.

**И. КАРИМОВ,
Ўзбекистон Республикаси Президенти**

Тошкент шаҳри, 2007 йил 13 декабрь

ШУКРОНА

Мустақилликка эришганимиздан кейин барча соҳаларда бўлгани каби диний ҳаётимизда ҳам жуда улкан, ибратли ислоҳотлар амалга оширилаётгани ҳаммага маълум. Истиқбол туфайли мусулмон халқимиз эмин-эркин ибодат қилиш баҳтига мусассар бўлди. Минглаб масжид, ўнлаб мадраса очилди. Юртдошларимизнинг муборак ҳаж ва умра сафарларига боришилари учун қулайликлар яратилди.

Диний таълимнинг мазмуни бойиб, мавқеи янада юксалди. Ёшларнинг илм эгаллашлари учун барча шароитлар муҳайё этилаётгани айниқса ибратлидир.

Истиқбол йиллари Ислом равнақи, жаҳон илм-фани ва маданияти ривожига салмоқли ҳисса қўшган буюк алломаларимиз таваллуд саналари халқаро миқёсда кенг нишонланди, зиёратгоҳлари обод қилинди. Уларнинг илмий меросини ўрганиш борасида амалга оширилаётгани ишлар айниқса эътиборлидир.

2007 йили бош шаҳримиз Тошкентга «Ислом маданияти пойтахти» деган юксак мақом бери-

лиши юртимизда амалга оширилаётган хайрли ишларнинг оламшумул эътирофи бўлди. Шу муносабат билан август ойида Тошкент ва Самарқанд шаҳарларида «Ўзбекистоннинг Ислом цивилизацияси ривожига қўшган ҳиссаси» мавзуида, ноябр ойида эса халқаро АЙСЕСКО ташкилоти ташаббуси билан Самарқанд ва Бухоро шаҳарларида «Ўзбекистон Ислом дунёсининг буюк мутафаккирлари юрти» мавзуида нуфузли халқаро илмий анжуманлар ўтказилди.

Хусусан, икки улуғ байрамимиз – Рамазон ва Қурбон ҳайитларини давлатимиз умумхалқ байрами сифатида эълон этгани ва ҳар йили Юртбошимизнинг махсус қарорлари билан дам олиш кунлари қилиб белгиланаётгани биз мусулмонларни беҳад қувонтиради.

Аллоҳ таоло Қурбон ҳайитини халқимизга кутлуг айласин!

**Абдулазиз МАНСУР,
Ўзбекистон мусулмонлари идораси раиси ўринбосари**

ҚАРИНДОШЛАРНИ ЙЎҚЛАБ ТУРИНГ

Меҳр кўриш ва кўрсатиш инсоннинг саодати омиллариданdir. Меҳр яхшиликдан туфилади. Шунинг учун динимиз яхшилик қилишга буюради. Инсонларнинг, умуман, бир-бирларига яхшилик қилишлари инсонийлик жиҳатидан лозим бўлса, қариндошларнинг ўзаро яхшилик кўрсатишлари қариндошлик ҳақидир. Қариндошлик алоқалари кучайган сари қалблар яқинлашади, меҳрга тўлади. Зотан, меҳр кўздадир. Қариндошлик алоқлари узилса, меҳр йўқолади. Меҳр йўқ қалбда ҳасад ва адovat бош кўтарилиди. Ҳасад ва адovatнинг оқибати хатарли бўлганидан Куръони карим ва ҳадиси шарифларда қариндошлик муносабатларини асрараш буюрилган. Нисо сурасининг биринчи ояти мазмuni бундай:

“Аллоҳ таолодан қўрқинг. Уни ёд этиб бир-бирингиздан нарса сўрайсиз. Қариндошлини узманг! Аллоҳ таоло сизларни доимо кўриб турувчиидир”.

Пайғамбаримиз (алайҳиссалом) бундай деганлар: “Қариндошлини узган жаннатга кирмайди” (*Имом Бухорий, Имом Муслим*).

“Аллоҳ таолонинг раҳмати ораларида қариндошлини узган кимса бор қавмга насиб этмайди” (*Табароний*).

Фуқаҳолар айтишади: “Қариндошлардан бири нимагадир муҳтоҷ бўлиб келганида унинг ҳожатини чиқармаслик қариндошлини узиш ҳисобланади. Амаки, aka ва тоға ота ўрнида; хола ва амма она ўрнида кўрилади. Қариндошларга салом ё ҳадя йўллаш билан боғланиб туриш вожибдир.

Қариндошларни йўқлаб туринг. Чунки “Ким ризқининг кўпайишини, умрининг узун бўлишини истаса, қариндошлини узмасин”, деганлар Расулуллоҳ (алайҳиссалом).

«HIDOVAT»

Ойлик диний-маърифий,
илмий-адабий нашр

Муассис

Ўзбекистон мусулмонлари идораси

Бош муҳаррир

Нуруллоҳ МУҲАММАД РАУФХОН

Таҳрир ҳайъати

Усмонхон АЛИМОВ
Абдулазиз МАНСУР
Абдураззок ЮНУС
Ортиқбек ЮСУПОВ
Нуридин ҲОШИМОВ
Анвар ТУРСУН
Невматилла ИБРОҲИМОВ
Аҳад ҲАСАНОВ
Зоҳиджон ИСЛОМОВ
Зоҳиллло МУНАВВАРОВ
Баҳодир КАРИМОВ
Эркин МАЛИК
Муҳаммад Шариф ЖУМАН
Юсуфжон ИСҲОҚ
Исомиддин ОЛИМ ШАЙХ
Абдул Жалил ХЎЖАМ
(Бош муҳаррир ўринбосари)
Аҳмад Муҳаммад ТУРСУН
Муҳаммад Собит САЛОҲИДДИН

Муқова

«Voris Design» маркази билан
ҳамкорликда тайёрланди.

Бадиий муҳаррир

Хайруллоҳ ҚУДРАТУЛЛОҲ ўли

Матнни

Райҳона ҲОЛБЕК қизи,
Зебунисо ҲУСАЙН қизи
терди

Тарғибот-ташвиқот марказлари:

Андижон вилояти — 8.374. 224-34-04
Раҳбари Ўқтам ҳожи Умрзоқ
Фарғона вилояти — 8.373.222-12-38
Раҳбари Салоҳиддин Нуридин
Сурхондарё вилояти — 8.376. 226-05-08
Раҳбари Низомиддин Чори

Мағзилимиз:

700069 Тошкент шаҳри
Зарқайнар 18-берк кўча 47а-үй;
Тел: 160-45-62, тел.факс: 144-36-53.
Интернет сайти: www.hidoyat.uz
Интернет почтами: hidoyat_jurnal@mail.uz
Ўзбекистон Республикаси Матбуот ва ахборот агентлигига рўйхатга олинган. Гувоҳнома рақами 0177.

Босишига 2007 йил 13 декабрда руҳсат берилди.
Босмахонага 2007 йил 14 декабрда топширилди.
Қоғоз бичими 60x84^{1/8}. Адали 20000 нусха. 206-сон буюртма. «КОҲИ NUR» МЧЖда босилди.

Қўйёзмалар қайтарилмайди. Мақолалар хат орқали
иёбориҳаннада исмлар тўлиқ, мансуз аниқ ёзилсан.
Мақолалар кўчирив босилса ёки иқтибос олинса,
«Ҳидоят»дан олингани кўрсатилиши шарт.

МУНДАРИЖА

Байрам муборак!	
Ўзбекистон Республикаси	
Президентининг Қарори	
Курбон ҳайитини нишонлаш тўғрисида	1
Таянч нуқта	
Қариндошларни йўқлаб туринг	2
Мужда	
Янгибай ҚЎЧҚОРОВ	
Нукусда янги кўпrik	5
Анжуман	
Аҳад ҲАСАНОВ	
Мусулмон шарқининг муҳим илмий	
маркази	6
Фикъ	
Мухаммад ШАРИФ ЖУМАН	
Савдо	8
ЎМИ ҳаёти	
Икки жомеъ	9
Хабарлар	
Хожилар асал ялашди	12
Тарбия	
Замзам ҚЎРБОНОВ	
Илм кўзни очади	13
Шарбатлар ичиринг	13
Амири маъруф	
Закариё ТУРСУН	
Одамлар орасида бир одам	14
Олисларга сайдат	
Аҳмад МУҲАММАД	
Беларус Республикаси	16
Катагон қурбонлари	
Шерали ТУРДИЕВ	
Таниқли олимлар сафида эди	18
Насиҳат	
Жъафар АҲСИКАТИЙ	
Тушқунликка ўрин йўқ	20
Ҳадис шарҳи	
Ризоуддин ибн ФАХРИДИН	
Яхшилил қадр топмаса	22
Шеърият	
Садирддин Салим БУХОРИЙ	
Ошиқмисан ва ё ўткинчи?	24
Хабиба БУРҲОН қизи	
Ўзингта юзландим	24
Тўра МИРЗО	
Пайғамбар (алайҳиссалом) мўъжизалари	25
Фармонқул РАСУЛОВ	
Тўртликлар	25
Анжуман	
Доктор Меҳмет ОҚҚУШ	
Ўзбекистондан Онадўлига илм-ирфон	
харакати	26
Адабий таҳлил	
Баҳодир КАРИМ	
Солиҳ зотлар назари	28
Тиббиёт бурчаги	
Мирзамир МИРЗАШАРИПОВ	
Зайтун ёғи хосиятлари	31
Болалар саҳифаси	
Хорун ЯҲЁ	
Айиқнинг жони асал	32

Тағсир

НАБА СУРАСИ

Аллоҳ таолонинг амрларига бўйсуниб, қайтариқларидан тийилган кишилар муттақийлар, тақвадорлардир. Охиратда муттақийлар имонсизлардан фарқли ўлароқ мевазор ва узумзорларга, тенгқур бокира хурларга, шарбат билан тўла жомларга сазовор бўладилар.

4

Хабарлар

ИСЛОМ ВА ОЛАМ

Тундрада аzon янгради

Русия Федерацияси Туймен вилоятининг энг чекка худуди – яманлар яшайдиган Хонимой қўргонида масжид очилди.

11

Наҳийи мункар

Фозил УРГАНЖИЙ

АДАШИШ БОИСИ



Мужоҳид (розийаллоҳу анху) дейди: «Албатта, сўзлар ёзиб борилади. Ҳатто киши фарзандини тинчтииш учун, сенга фалон-фалон нарсаларни сотиб оламан, деса ҳам, ёзиб қўйилади».

Масала

БИР САВОЛ СЎРАСАМ...



Васвасага йўлиққан киши Аллоҳни зикр этиб, икки “Кул аъзуз...” сурасини ва “Оятал курсий”ни ўқиши керак.

23

Саҳобалар ҳаёти

Холид Мұхаммад ХОЛИД

АСМО БИНТИ ЯЗИД

30

Ёнимиздан Расулуллоҳ (соллаллоҳу алайҳи ва саллам) ўтиб қолдилар. Бизларга салом бериб: “Куфрони неъмат қилишдан сақланинглар”, дедилар. Сўрашга журъатлироғи мен эдим. “Ё, Расулуллоҳ, куфрони неъмат нима?” деб сўрадим.

بِسْمِ اللَّهِ الرَّحْمَنِ الرَّحِيمِ

إِنَّ لِلْمُتَّقِينَ مَفَازًا ۝ حَدَّا يِقَ وَأَعْنَبَا ۝ وَكَاسًا دِهَاقًا ۝ لَا يَسْمَعُونَ
فِيهَا لَغْوًا وَلَا كِذَابًا ۝ جَزَاءً مِنْ رَبِّكَ عَطَاءً حِسَابًا ۝ رَبِّ الْسَّمَاوَاتِ وَالْأَرْضِ وَمَا بَيْنَهُما
الْرَّحْمَنِ لَا يَمْلِكُونَ مِنْهُ خَطَابًا ۝ يَوْمَ يَقُومُ الْرُّوحُ وَالْمَلَائِكَةُ صَفَّا ۝ لَا يَتَكَلَّمُونَ إِلَّا مَنْ
أَذِنَ لَهُ الْرَّحْمَنُ وَقَالَ صَوَابًا ۝ ذَلِكَ الْيَوْمُ الْحَقُّ فَمَنْ شَاءَ أَخْتَذَ إِلَى رَبِّهِ مَعَابًا ۝ إِنَّا أَنَّدَ
رَثْكُمْ عَذَابًا قَرِيبًا يَوْمَ يَنْظُرُ الْمَرءُ مَا قَدَّمَتْ يَدَاهُ وَيَقُولُ الْكَافِرُ يَلْيَتِنِي كُنْتُ تُرَابًا ۝

НАБА СУРАСИ*

31-34. Жаннат – боғлар, узумзорлар, тенгкур бокиралар, тўла жомлар муттакийларгадир. **35.** Улар жаннатда бехуда ва ёлғон сўзни эшитишмас. **36.** Бу саналганлар Парвардигорингизнинг уларга, амалларига яраша мукофоти ва марҳаматидир. **37.** Парвардигорингиз – осмонлар ва ернинг, уларнинг оралиғидаги нарсаларнинг Парвардигоридир, меҳрибондир. Унга ҳеч ким сўзлай олмас. **38.** Жаброил ва фаришталар сафланиб турадиган кунда фақат Раҳмон изн бергангина сўзлар ва рост сўзлар! **39.** У кун ҳақдир, муқаррардир. Ким истаса, Парвардигорига қайтишини танласин. **40.** Биз сизларни яқин азобдан огоҳлантиридик. У кунда барча киши қилган амалларини кўрар ва имон-эътиқодсиз киши: “кошки тупроққа айлансан” дер.

Тафсири

31-34. Жаннат – боғлар, узумзорлар, тенгкур бокиралар, тўла жомлар муттакийларгадир.

Мазкур оятларда имон ва солиҳ амал билан яшаб ўтган бандаларга охиратда ҳозирланган неъматлар қисқача саналган.

Аллоҳ таолонинг амрларига бўйсуниб, қайта-риқларидан тийилган кишилар муттақийлар, тақвадорлардир. Охиратда муттақийлар имонсизлардан фарқли ўлароқ мевазор ва узумзорларга, тенгкур бўкира ҳурларга, шарбат билан тўла жомларга сазовор бўладилар.

35. Улар жаннатда бехуда ва ёлғон сўзни эшитишмас.

Жаннатда фойдасиз, бехуда ва ёлғон сўз бўлмас. Жаннат омонлик жойидир. Унда бирор бехуда нарса, ноқис нарса йўқдир.

36. Бу саналганлар Парвардигорингизнинг уларга, амалларига яраша мукофоти ва марҳаматидир.

Аллоҳ таоло ўз вадасига мувофиқ – яхшиликларнинг савобини бир неча баробар ошириши ва ёмонликларни кечириши билан тақводорларни имонлари ва солиҳ амалларига кўра мукофотлайди, фазл кўрсатиб, у саналганларни уларга ато этади.

37. Парвардигорингиз – осмонлар ва ернинг, уларнинг оралиғидаги нарсаларнинг Парвардигоридир, меҳрибондир. Унга ҳеч ким сўзлай олмас.

Имонли ва тоатли бандаларга олий мукофот ва марҳамат Буюк ва Улуғ Зотдан, раҳмати барча нарсани қамраб олган меҳрибон, еру осмон ва унинг ўртасидаги нарсаларнинг Парвардигоридандир. Унинг буюклиги ва улуғлигидан ҳеч ким изнисиз сўзлай олмайди.

38. Жаброил (алайҳиссалом) ва фаришталар сафланиб турадиган кунда фақат Раҳмон изн бергангина сўзлар ва рост сўзлар!

Аллоҳ таолонинг улуғлиги Қиёмат куни ҳайлийққа очиқ билинади. Ҳатто даража ва марта-балари баланд бўлган Жаброил (алайҳиссалом) ва сафланган ҳамма фаришталар ҳам ўша куни гапира олишмайди. Улар фақат икки шарт билан гапира олишади, холос. Бири, Аллоҳ таоло шафоатга изн берса, “У Кун келганда, бирон жон гапирмас, фақат Унинг (Аллоҳнинг) изни билангина гапиур” (Худ, 105). Иккинчиси, изн берил-

*Охри. Бошлиниши ўтган сонларда

МАМЛАКАТ ЯНГИЛИКЛАРИ

Нукусда янги кўприк

Қорақалпогистон пойтахтида узунлиги саккиз километр келадиган замонавий ҳалқа йўли барпо этилди.

Мазкур қурилиш доирасида “Қиззетган” каналига янги кўприк қурилиб, шаҳарнинг “Телемарказ” мавзеи билан “Жийдали Бойсун” қишлоғи ўзаро боғланди. Қиймати 1,3 миллиард сўм бўлган бу инишот шаҳарнинг йўл-улов тизимидан муносаб ўрин эгаллади.

Янгибай ҚЎЧҚОРОВ,
“Халқ сўзи” мухбари

Жиззахда “Китоб байрами”

Вилоят ахборот-кутубхона марказида ўтган “Китоб байрами” республикадаги “Шарқ” нашриёт-матбаа акциядорлик компанияси, “Ўзбекистон”, “Ўқитувчи”, “Чўлпон” нашиёт-матбаа ижодий уйлари, “Ўзбекистон миллий энциклопедияси” давлат илмий нашриёти, “Маънавият”, “Сангзор” нашриётларининг кўргазма бозорини томоша қилишдан бошланди.

Байрамда умумтаълим мактаблари учун 2008–2009 ўқув йилига мўлжалланган дарслик ва ўқув қўлланмаларининг намойиши ҳам бўлди. Халқ таълими мутасадилари, соҳа мутахассислари ва бошқа иштирокчилар нашриётларга буюртмалар беришли.

Баҳриддин САТТОРОВ,
“Халқ сўзи” мухбари

Тўйболалар сийланди

Қорақалпогистон Республикаси Элликқалъа туманидаги Абдулла Наринжоний зиёратгоҳи Бўстон шаҳар “Қуёш–Ой” болалар боғчасининг ўн бир нафар тарбияланувчиси хатна тўйига ҳомийлик қилди. Шодиёнада бошдан-оёқ янги либослар кийган тўйболаларга ҳар бирининг номига йигирма минг сўмдан ўтказилган омонат дафтарчалари ҳам топширилди.

Раззоқберди ШАПИЕВ

Вагон ҳам ўзимизники бўладиган бўлди

«Ўзбекистон темир йўллари» давлат ҳиссадорлик компаниясига қарашли Куюв-механика заводида вагон ишлаб чиқариш йўлга қўйилди.

Шу муносабат билан заводда беш юздан ортиқ янги иш ўрни очилди. Мутахассислар фикрича, вагонлар 160 минг километр юрганидан сўнг таъмирларга муҳтоҷ бўлади. Мамлакатимизда вагон ишлаб чиқарилиши бу эҳтиёжни қоплаш имконини беради.

Сайёра ШОЕВА,
ЎзА мухбари

ган шафоат қилувчи ҳақ ва рост гапиради. Шафоатга сазовор бўлган шахс дунёда тўғри сўзни, яъни, “Лаилаҳа иллаллоҳ”ни айтган бўлиши лозим.

39. У кун ҳақдир, муқаррардир!
Ким истаса, Парвардигорига қайтиши танласин.

Фаришталар мазкур ҳолатда турадиган кун шак-шубҳасиз собит бўлажак. Ким у Кунда нажот топишни хоҳласа, Парвардигорининг марҳаматига олиб борадиган йўлни танласин. Бу йўл ҳақ имон ва солиҳ амаллар йўлидир.

40. Биз сизларни яқин азобдан огоҳлантиридик. У кунда барча киши қилган амалларини кўради ва имонсиз киши “кошки тупроққа айлансан”, дейди.

Биз сизларни яқинда бўлажак азобдан огоҳлантиридик. У қиёмат куни азобидир. Қиёмат бўлиши муқаррар. “Улар қиёмат кунини кўришганда, гўё дунёда жуда оз – чошгоҳ ё асрографа тургандек бўлишади” (*Нозиот*, 46).

Қиёмат куни барча киши ҳаётлик пайтида қилган яхши ва ёмон ишларини кўради. “Ҳар бир жон қилган яхши амаллари келтирилганини кўрадиган, ёмон амаллари ундан жуда узоқ бўлишини истайдиган Кундан сақланнинг!” (*Оли Имрон*, 30).

Қиёмат азоби ва даҳшатини кўрган имонсизлар бир-бирларидан қасос олиб, тупроққа айланниб кетадиган ҳайвонларни кўргач: “Кошки тупроқ бўлсан, кошки инсон бўлмасам”, деб орзу қиласди.

Ибн Касир зикр қилганларидек, қиёмат куни ҳайвонлар ҳам тирилтирилади ва шоҳсиз ҳайвонларга шоҳли ҳайвонлардан қасос олиб берилади. Кейин улар тупроққа айлантириб юборилади. Кофир кимса азобдан қутулиш учун ана шу ҳолатни орзу этади.

Ибн Касир «Тафсир»и, Куртубий «Тафсир»и, «Фатхул Қодир» тафсiri, Найсубурийнинг «Асбаба ан-нузул» ҳамда «Фароубул Куръон» китоблари асосида Анвар АХМАД тайёрлади

Аввал хабар берганимиздек, Самарқанд ва Бухоро шаҳарларида «Ўзбекистон Ислом оламининг буюк мутафаккирлари юрти» халқаро илмий анжумани бўлиб ўтди. Уибу сонда мазкур анжуман иштирокчиларидан айримларининг маърузала-ри билан танишасиз.

АҲАД ҲАСАНОВ,
Тошкент Ислом университети профессори



МУСУЛМОН ШАРҚИНИНГ МУҲИМ ИЛМИЙ МАРКАЗИ

Бундан бир неча йил аввал Аҳмад Фарғоний тўйини нишонлаётган чогимиизда эътиборга арзирли бир суҳбатни эшитган эдим. Грузин академигидан: «Айтинг-чи, жаҳон астрономия фанига кўшган ҳиссаси масаласида Ўзбекистон билан Грузияни қиёслаб бўладими?» деб сўрабдилар. Академик: «Йўқ, бу осмон билан ерни қиёслаган кабидир», деб жавоб бериди.

Тарих илмида “ўрта асрлар” деб аталаувчи палалар Шарқда илмий ва манавий тафаккур гуркираб равнақ топган давр ҳисобланади. Ўзбекистонга нисбатан олинганда бу давр ўз навбатида уч қисмга бўлинади: аббосийлар халифалиги таркибидаги мусулмон уйгониш даври (IX – XI асрлар); мустақил сомоний, қораҳоний, хоразмшоҳ сулолалари даври (XI – XIII асрлар); Амир Темур ва темурийлар даври (XIV – XV асрлар). Мана шу уч даврни яққолроқ тасаввур қилиш учун Бағдоддаги «Байтул ҳикма» ва унда фаолият кўрсатган мовароуннахрлик олимлар, Хоразмдаги Маъмун ва Самарқанддаги Улугбек академияларини эслаш кифоя.

Ушбу мавзунинг манбалари ҳақида гап кетгандан биз, албатта, биринчи навбатда Ибн Надимнинг «Фиҳрист»и, Қифтийнинг «Ихбарул Улама», Ибн Усайбианинг «Уйунул анба», Ёкут Ҳамавийнинг «Муъжамул удаба», Ибн Халликоннинг «Китабул вафайат», Байҳақийнинг «Татимма», Табарийнинг «Тарих», Бағдодийнинг «Тарихи Бағдод», Ибн Халдуннинг «Муқаддима» асарларини эsgа оламиз.

Хоразмий, Фарғоний, Бухорий, Термизий, Форобий, Беруний, Ибн Сино, Замахшарий каби буюк мутафаккирларимиз ўзлари туғилиб ўсган юртларида олим сифатида шаклланишди, сўнгра аббосийлар халифалигининг турли шаҳарларида фаолият кўрсатиши. Бу ҳол минтақамизда кучли илмий замин, анъана мавжуд бўлганидан да-лолат. Оврупалик олим Ю. Рушкнинг қуйидаги сўзларини келтириш ўринли: «Г. Зутер тузган

рўйхатда математика ва астрономия соҳаси олимларининг деярли барчаси Хуросон, Мовароуннахр ва Фарғонадандир».

Тарих фанлари доктори Баҳром Абдуҳалимов Бағдоддаги «Байтул ҳикма»да фаолият кўрсатган ўн беш ўргаосиёлик олимнинг ижодини ўрганиб, табиий фанлар ривожига кўшган ҳиссасини ёритиб берган. Албатта, «Байтул ҳикма» Хорун ар-Рашид ва Маъмун каби буюк халифалар ҳомийлиги ва бевосита раҳбарлиги остида бўлганини унутмаслик керак.

X–XI асрларда аббосийлар халифалиги инқирозга юз тута бошлаганида ҳам Мовароуннахрда илмий марказ аҳамиятини йўқотмади.

Хитой, сўғд ва форс тилларидаги манбаларга кўра, Мовароуннахрда исломлашув жараёни ўзига хос тарзда кечган. Ўлкада буддийлик, монийлик тез барҳам топган. Зардуштийлик бирмунча вақт қаршилик кўрсатиб келган. Ислом фалаба қозонгач, насронийликнинг несториан мазҳабидан ҳам из қолмади. Анча кейин ўлкага чоризм билан бирга рус православ черкови кириб келди. Буддийлик ожизлик қилган бўлсада, унинг таъсири баъзан кўзга ташланиб турди.

Эронда ва ҳатто аббосийлар халифалигининг пойтахти Бағдодда фақат XI асрда мадрасалар очилган бўлса, Мовароуннахрда X асрдаёқ кўплаб мадрасалар мавжуд эди. Энг муҳими, бу мадрасалар давлат ва сиёсатдан мустақил бўлган ва Ислом динини ёйища жуда катта хизмат қилган.

Сомонийлар қизғин ташқи сиёсат юритдилар ва шимолда бир неча шаҳарларни фатҳ қилиб, Исломга киритдилар. 893 йили улар Тароз ёки Талос (ҳозирги Авлиё ота)ни фатҳ этиб, у ердаги катта черковни масжидга айлантиридилар. Бошқа йўл, яъни, қадимги Сўғд одатига кўра, каттакатта жамоа бўлиб, даштга кўчиш йўли билан ҳам учта мусулмон шаҳри ташкил топди: булар Женд, Хавора ва Янгикентdir.

Х аср охирларида Мовароуннахрда ҳукмронликка эришган қорахоний ҳокимлар тақводор, маст қилувчи ичимлик истеъмол қилмаган мўмин-мусулмонлардан бўлдилар. Қорахонийлар ва газнавийлар ёки Эрон ва Турон ўртасидаги урушлар ҳақида ҳикоя қилувчи Фирдавсийнинг «Шоҳнома»си айни ўша пайтда бунёдга келди.

Салжуқларга келсак, Х асрда улар сомонийлар ва қорахонийлар ўртасидаги курашда бир у томон, бир бу томон бўлиб келгандар. Жамоажамоа бўлиб яшашарди, умумий ҳокимлари йўқ эди. Х асрнинг буюк файласуфи, «иккинчи муаллим» Абу Наср Форобий ана шу жамоалардан етишиб чиқкан. XI асрга келиб салжуқлар ўзларининг машҳур гарбга юришларини бошладилар, аввал Эронда, сўнг кичик Осиёда буюк салжуқ давлатини барпо қилдиларки, салб юришлари пайтида улар «салотин ал-ислом» лақабини бежиз олмаган кўринишади. Салжуқнинг авлодлари Ислом сultonлари сифатида аҳли сунна ва жамоа йўлини маҳкам ушладилар. Айниқса, сомонийлардан уларга ўтган ҳанафий мазҳабининг гайрли ҳимоячилари бўлдилар. Тўғрулбек даврида қисқа муддат ҳатто шофеъийлар таъқиб остига олинадилар, аммо унинг давомчиси Алп Арслон даврида шофеъий Низомулмулк унинг энг яқин маслаҳатчиси ва вазири вазифасини бажарган. Султон Валад ибн Жалолиддин Румий форс ва турк тиллари билан бир қаторда араб ҳарфлари билан юонон тилида шеърлар битган. Юсуф Боласоғунийнинг «Қутадгу билик» ва Маҳмуд Қошғарийнинг «Девону луготит турк» китоблари икки йил фарқ билан деярли бир пайтда 1069-1070 йилларда ёзилганини ҳам эслаш ўринлидир.

Туркларнинг моддий маданияти бобида Маҳмуд Қошғарий китобидан бир сўзни мисол келтирамиз. У «олоту» сўзига бундай шарҳ беради: «эркак киши чўнтағида олиб юрадиган ва у билан бурнини артадиган шойи мато парчаси». Маълумки, даструмлча қадимда ва ўрта асрларда на Юнонистанда ва на араб дунёсида ишлатилган. Оврупага у XV асрда кириб келди. Қадимдан Хитойда ва Японияда маълум бўлган рўмолча XI асрда туркларда ишлатилган экан.

Хоразмшоҳлар даврида буюк мутасавиф Юсуф Ҳамадонийнинг халифаларидан бири Аҳмад Яссавий (вафоти 1167 й) ва унинг шогирлари Ҳаким ота ва Сулаймон Боқирғонийлар халқ орасида шуҳрат қозондилар.

XIII асрдаги мўгуллар истилоси қанчалик қирғинли бўлмасин, Хоразм ва унинг пойтахти Урганч тез орада яна тикланди ҳамда Шарқ ва Фарб савдосида энг йирик шаҳарлардан бирига айланди. 1333 йили зиёратга келган Ибн Батута уни энг катта, энг муҳим ва энг гўзал турк шаҳари деб таърифлаган. XIII аср Хоразм уламоларидан икки киши – Замахшарий билан Шаҳристоний ало-

ҳида ажralиб туради. Булар ҳаммага маълум зотлардир. Аммо охирги Хоразмшоҳ – 1221 йили Хоразмни тарқ этиб, 1231 йили мўгуллар билан жангда ҳалок бўлган Жалолиддин Мангуберди турк тили ҳақида катта китоб ёзганини ҳамма ҳам билмаса керак.

Амир Темур ва темурийлар (XIV-XV асрлар) даври ҳақида ёзиш қийин: маълумотларнинг етишмаслигидан эмас, балки, аксинча, академик Бартолд айтганидек, маълумотлар ҳаддан зиёд кўплигидан. Аммо академик Бартолд Амир Темурни ўқишини ҳам, ёзишини ҳам билмаган уммий (оми) эди, деб хато қилгани аниқ. Зоро, ёшлигига мадрасада ўқигани, унинг мадрасадошлари ака-ука Сайид Абу Маолий ва Али Акбарлар замонасининг йирик дин пешволари бўлишгани, Баҳовуддин Нақшбанднинг устози Амир Кулол унинг отаси Амир Тарагайга яқин дўст бўлгани ва уларнинг уйларида тез-тез бўлиб туриши, улғайганида форс ва турк тилларини мукаммал билгани, исломий билимлардан яхшигина хабардор бўлгани, Бағдод, Дамашқ ва Халаб шаҳарларида уламоларнинг кенгашларини чақириб, улар билан баҳслашгани, тарихни чуқур билиши ўша даврнинг энг буюк мутафаккири Ибн Халдунни хайратга солган. Буларнинг ҳаммаси аниқ маълумотлар.

Амир Темур топшириғи билан жуда кўп китоблар ёзилди. «Тузуклар»нинг муаллифи албатта Амир Темурдир, бошқа киши унинг номидан ёзган бўлиши мумкин эмас.

Амир Темурдан сўнг икки шаҳар пойтахт бўлиб қолди. Асосий меросхўр Шоҳруҳ Мирзо Балҳда ҳукм сурган бўлса, унинг номидан ўғли Улугбек Самарқандда туриб қирқ йилдан ортиқ муддат Мовароуннахрни бошқарди. Шоҳруҳ Мирзо доимо ўзини муслим сulton деб таъқидлаб келган, тарихий кўллэзмаларнинг ихлосманди бўлган.

Улугбек Ислом тарихида бир вақтда ҳам ҳоким, ҳам олим бўлган ягона шахсадир, дейиш мумкин. Бу жиҳатдан уни Арастунинг шогирди Искандарга ўхшатишади. Улугбек ва унинг шогирлари фалакиёт илмида эришган ютуқлар мусулмонлар бу соҳада етишган буюк натижа деб ҳисобланади. Улугбек нафақат ўзи илм билан шуғулланди, балки ўзидан сўнг Али Қушчи сингари давомчи ҳам қолдирди. Улугбек билан Али Қушчи бирга тайёрлаган «Зиж» жадваллари дақиқлиги (аниқлиги) билан ҳозирги замон олимларини ҳам лол қолдиради.

Яна бир қизиқ маълумот: XI асрдан бери Смарқандда шайхулислом мансабини «Ҳидоя» муаллифи Бурҳониддин Марғононий авлодлари эгаллаб келишар экан. Мирзо Улугбек замонасининг «шайхулислом»лари билан калом илми хусусида баҳслар юритгани маълум бўлди.



САВДО

Сотиб олинган мол ва бадалининг тасарруфи

(«Ҳидоя», «Мухтасарул виқоя», «Қозихон», «Раддул мұхтор» ва
«Дүррул мұхтор» китоблари асосида)*

Бу мавзу сотиб олинган нарсалар ва унга тўланган пул (бадал)ни қандай ишлатишга доир масалалар ҳақидадир.

Кўчма (ҳайвон, дон, кийим каби) молни сотиб олган киши уни қабул қилиб олмай сотиб юбориши мумкин эмас. Чунки харидор молни қабул қилиб олмагунича савдо тугал бўлмайди ва мол унинг мулкига ўтмайди. Бунинг устига, кўчма молнинг нобуд бўлиш эҳтимоли ҳам бор. Мол нобуд бўлса, савдо бузилади. Харидор у молни сотиб юборса, ўзганинг молини сотган ҳисобланади. Ўзганинг молини сотиш мумкин эмас. Аммо кўчма молни сотиб олган киши уни қабул қилиб олмай, ҳадя ва садақа қилиши ё қарзга бериши мумкин. Чунки, у молни садақа ва қарзга оловчи кишининг қабул қилиб олиши ўрнига ўтади.

Бузилиш хавфи бўлмаган кўчмас мулк сотиб олинганида уни қабул қилиб олмай сотиб юбориш, ҳадя ва садақа қилиш мумкин, лекин ижарага бериш мумкин эмас. Чунки ижара ҳам кўчма мол ҳукмидадир.

Кўчмас мулкни сотиб олган киши унинг пулини сотувчига тўламай ё сотувчининг рухсатисиз сотган бўлса сотувчи савдони бекор қилишга ҳақлидир.

Вазни ё сифими ўлчаниб ёки сони саналиб сотиладиган нарсаларни, вазни ё сифимини ўлчаб ёки сонини санаб олиш шарти билан сотиб оловчи уларни ўлчаб ё санаб сотиб олиши керак. Бу ҳолда сотувчинг олдин (уйида ё омборида) ўлчаб чиққани ё ўлчаб қўйгани ҳисобга ўтмайди. Бошқача айтганда, сотувчи у нарсаларни сотиб оловчига унинг кўз ўнгида ўлчаб, санаб бериши шарт. Сотиб оловчи ўз кўз ўнгида ўлчанмаган ё саналмаган молни мазкур шарт билан олган бўлса, уларни ўлчаб ё санаб қўрмай ейиши ё сотиши мумкин эмас. Зоро, ўлчаб ё санаб қўрмаса, қабул қилиб олган бўлмайди.

Сотувчи молини нақдга сотган бўлса, молининг пулини (бадалини) қабул қилиб олмай иш-

латиши мумкин: уни истаган кишига ҳадя ё садақа қилиши, қарзга ё ижарага бериши ёки бадал мол бўлса, сотиб юбориши ё унинг ўрнига бошқа нарса олиши жоиз. Аммо молини насияга сотган бўлса, унинг бадалини фақат сотиб олган кишига садақа қилиши ё ҳадя қилиши ё унинг ўрнига ундан бошқа нарса олиши мумкин. Чунки кишининг зиммасидаги нарсани ундан бошқага мулк (ҳадя, садақа) қилиб бериб бўлмайди. (Валига молингизни юз минг сўм насияга сотган бўлсангиз, у юз минг сўмни Бақрга ҳадя ё садақа қилиб беришингиз мумкин эмас. У пулни фақат Валининг ўзига ҳадя ё садақа қилиб беришингиз ё унинг ўрнига ундан бошқа нарса олишингиз мумкин.)

Сотиб оловчи сотувчига молининг келишилган нархи устига қўшиб бериши ё қўшиб бераман дейиши жоиз. Бироқ бунинг икки шарти бор: бири – сотиб олинган мол турган бўлиши; иккинчиси – сотиб оловчининг келишилган нархга қўшиб бериш таклифини, жойида, сотувчи қабул қилиши керак.

Шунингдек, сотувчи молини келишилган нархга сотиб оловчига айтганидан ортиқ бериши ё ортиқ беришини ваъда қилиши ҳам мумкин. Фақат бунинг бир шарти бор: унинг ортиқча беришини сотиб оловчи, жойида, қабул қилиши керак.

Ва яна сотувчи сотиб оловчидан молининг келишилган нархидан кам пул олиши ҳам жоиз.

Бу саналган ҳолларда савдо мол биринчи келишилган нархда ё миқдорда эмас, балки кейин қўшиб берилган ё камайтирилган нарх ё миқдор устида бўлган ҳисобланади: сотиб оловчи қўшиб бераман деган пулини тўлаши; сотувчи айтган миқдорини бериши ё олиши керак.

Муҳаммад ШАРИФ ЖУМАН

*Охир. Бошланиши ўтган сонларда

2007 йилнинг сўнгги уч ойи ичидаги Тошкент вилоятининг Зангиота туманида “Бўзсув”, Юқори Чирчик туманида “Бардонқўл” ва “Саксон ота” жомеъ масжидлари қайта қурилиб, фойдаланишга топширилди.

* * *

Бардонқўл қишлоғида 1910 йилдан масжид бор эди. Совет даврида анча муддат ёпиб қўйилди. Динсизлар тазиёки билан қаровсиз қолдирилди, жаноза намозидагина одамлар йигилмаса, бошқа пайтлар ҳувиллаб ётарди. Ниҳоят, мустақил бўлдик. Диний эркинлик, маърифатга интилиш Бардонқўлда ҳам ўзгариш ясади. Қавм кўпайди. Эскирган иморат талабга жавоб бермай қолди. Масжид торлигидан, айниқса, ҳайит намозида кўпчилик ташқарида ибодат қилишга мажбур бўлишар эди.

Ноябрнинг 9-куни “Бардонқўл” жомеъ масжидининг янги биноси очилди ва жума намози роҳатланаб адо этилди.

* * *

Саксон ота қишлоғи аҳлига эса, совет даврида ҳам кўшни қишлоқликлар ҳавас билан қарашарди. Боиси қишлоқда илмли одамнинг борлиги эди. Бухородаги Мир Араб мад-



сон ота” жомеъ масжида янги биноси очилди. Унда сўзга чиқсан Ўзбекистон му-

ИККИ ЖОМЕЪ



Икки йил бурун қишлоқ аҳли бир бўлиб эски хонақоҳ ўрнида янги бино тиклашга киришишди. Натижада замонавий қулайликларга эга, ёрув ва кенг, беш юз киши сифадиган бино қуриб битказилди.

расасини биринчилар қаторида битирган Камолхон Оқилхон ўғли 50-йиллар бошида қаровсиз қолган “Саксон ота” масжидида имом-хатиб сифатида иш бошлади ва қирк йилдан ортиқ вақт давомида мусулмонлар хизматида бўлди.

Кейинги йиллар замонавий бинога эҳтиёж ортди. Ниҳоят, орзу рўёбга чиқиб, “Саксон ота” жомеъ масжида эски биноси ўрнида ярим йил ичидаги яқин беш юз киши ибодат қиласа бўладиган уч томони айвонли жомеъ қуриб битказилди.

Ноябрнинг 24-куни “Сак-

сулмонлари идораси раиси ўринбосари Абдураззоқ Юнусов қишлоқ аҳлини янги маърифат ошёни билан қутларкан, шу қаторда ушбу масжидда оғир замонларда ишлаганлар ҳаққига ҳам яхши дуолар қилди.

ЎМИнинг Тошкент вилояти бўйича вакили Курбонали домла Турсунов эса масжид биносини тиклашда жонкуярлик кўрсатганларнинг барчасига, хусусан, бош ҳомий фазалкентлик табиб Абу Бакр ҳожи Тешабой ўғлига алоҳида миннатдорлик билдириди. Масжид курганларга ҳадиси шарифларда башорат қилинганидек, олий мақомлар насиб этишини тилади.

Вафо ФАЙЗУЛЛОҲ

ИСЛОМ ВА ОЛАМ



Исломий гўзаллик куни



Шу йил ноябрининг ийгирма бешинчи куни Буюк Британия пойтахти Лондон шаҳрида катта маърифий тадбир – “Исломий гўзаллик куни” ўтказилди. “Бирдаммлик ва тинчлик куни” учинчи халқаро анжумани доирасида

ги ушбу тадбирни мамлакат Ислом уюшмаси фаоллари ташкил этишиди.

Ташкилотчилар айтишича, тадбирдан кўзланган мақсад ахоли орасида динимизга оид билимларни чукурроқ тарғиб этишдир.

Учинчи халқаро анжуманга дунёнинг турили минтақаларидан эллик мингдан ортиқ киши ташриф буюрди.

IslamOnline

Бош котиб чақириғи



Ислом Конференцияси Ташкилоти Бош котиби Акмалидин Эҳсонўғли жаҳон жамоатчилигини болалар хуқуқини ҳимоя қилиш бо-

расида кўпроқ ишлашга чақириди.

“Болалар ҳаммадан кўра нозик, ғамхўрлик ва ҳимояга жуда муҳтождир. Афсус, улар кўпгина ривожланаётган мамлакатларда ижтимоий адолатсизлик, хукуқбузарликлардан жабр кўришяпти”, дейилади ИКТ раҳбари мурожаатида.

Мурожаатда болалар хуқуқига энг катта хавф қашшоқлик экани таъкидланади. “Агар БМТнинг дунё давлатлари раҳбарлари имзолаган “Мингийиллик тараққиёти мақсадлари” шартномаси мажбуриятларини бажаришга бор куч билан киришсак, – дейди ИКТ раҳбари, – бу хавфнинг бартараф этилишига шубҳа йўқ”.

PPA

Куддус бутун башарият мероси

Туркияning Истанбул шаҳрида “Куддус бутун башарият меросидир” мавзууда халқаро анжуман бўлиб ўтди.

Анжуманга дунёнинг олтмиш беш мамлакатидан беш минг иштирокчи йифилди. “Ал-Куддус” халқаро институти бош котиби Акрам Одилоний анжуман ташкилотчиси бўлди.

“Мақсадимиз Куддус фақат араб-мусулмон минтақасига эмас, балки бутун инсониятга оид улуғ мерос эканини жаҳон афкор оммасига етказишdir”, дея таъкидлади Акрам Одилоний. Анжуман доирасида муқаддас шаҳар тарихидан ҳикоя қилувчи фото кўргазмалар, ҳужжатли фильмлар намойиш этилди.

IslamOnline

Равзада аёллар учун майдон

Мадина шаҳридаги Пайғамбар (алайҳиссалом) масжидлари худудида зиёратчи аёллар учун қўшимча маҳсус майдон очиладиган бўлди. Энди аёллар Расу-



луплоҳнинг (алайҳиссалом) қабрлари ва минбарлари ораси – Равзага зиёратчилар оқими кескин ортган кунлари ҳам бемалол кела олишади. Масжидун Набавийни кенгайтириш масалаларига бағишиланган матбуот анжуманда бошқарма вакили Абдул Воҳид Хаттобана шу ҳақда маълум қилди.

“Ислам для всех”

Тундрада азон янгради

Русия Федерацияси Туймен вилоятининг энг чекка худуди – яманлар яшайдиган Хонимой қўргонида масжид очилди. Қўргонга янги имом келиши билан бир намозгоҳ очиш ишларига киришилган эди. Маъмурият ҳам мусулмонлар хоҳишига кўра жой, бино ажратди, курувчилар таъмирлаш ишларida кўмаклашишди. Орадан бир ой ўтиб-ўтмай, мусулмонлар кенг ва ёруф бинода жамоат бўлиб намоз ўқий бошлашди.

“Муслим-Инфо”

Халқаро анжуман режалари

Татаристон Фанлар академияси ва Ислом олами Фанлар академияси 2008 йилнинг август ойида халқаро анжуман ўтказиши режалаштиряпти. Анжуман Ислом олами муаммоларига бағишиланади. Татаристон ФА вице-президенти Рузал Юсупов шу ҳақда маълум қилди.

Ислом олами Фанлар академияси (IAS) 1986 йили тузилган мусулмон мамлакатлари олимларини бирлаштирувчи ноҳукумат, носиёсий ташкилотdir. Фаолиятининг бош йўналишлари – Ислом, илм-фан, технологиявий тараққиёт. Ташкилотнинг асосий вазифаларидан бири мусулмон мамлакатлари тараққиётiga хизмат қилувчи олимлар ҳамкорлигини кенгайтириш, ўзаро ахборот алмашинувига кўмаклашишдир.

Islam.ru

Рим папаси таклиф этди



Оврупа мусулмонлари етакчила-ри Папага йўлланган очик хатга жавобан Ватиканнинг ўзаро мuloқotга таклифини маъқуллашмоқда.

Фатво ва тадқиқотлар бўйича Оврупа кўми-таси раҳбарларидан бири Фейсал Мавла-вий Ватикан таклифи иккала дин вакиллари

ўртасида мулодотлар кўпригини ўрнатишига ёрдам беришини айтди.

Таъкидлаш керак, Рим папасининг мусулмон етакчилари Очик хатига жавоби ва таклифига турлича ёндашув кузатилмоқда.

IslamOnline

Ҳожилар учун ўн беш мингта автобус

Бу йилги ҳаж мавсумида ҳожиларга ўн беш мингдан ортиқ автобус хизмат кўрсатяпти. “Женерал Моторс” ширкатининг Саудия Арабистонидаги вакили Закариё Жоҳаржий шу ҳақда маълум қилди.

Лойиҳа Макка, Мадина, Жидда шаҳарлари, шунингдек, Мино водии, Муздалифа, Арафот тоғи йўналишларида аниқ тартиб билан амалга оширилади. Бу хайрли ишга “Уммул Куро”, “Хафил”, “Ал-Жазира”, “Макка”, “Арабиян” каби ширкатларнинг уловлари ҳам жалб этилган. “Ҳаж арконларини адо этишда ҳожилар эътиборини ҳеч бир нокулайлик чалғитмаслигига эришиш асосий мақсадимиздир”, деди Закариё Жоҳаржий.

IslamNews

Бангладешга ёрдам

Мусулмон мамлакатлари ва инсонпарварлик ташкилотлари вайрон қилувчи тўфон ичидага қолган Бангладеш ҳалқига ёрдам қилишга шошилишмоқда. Табиий оғат туфайли бу мамлакатда уч мингдан ортиқ киши ҳаётдан кўз юмди, миллионлаб аҳоли бошпанасиз қолди.



Ёрдам қилувчилар рўйхатида Саудия Арабистони биринчи ўринда. Қироллик ҳукумати юз миллион доллар маблағ ва уч юз тонна озиқ-овқат, дори-дармон ажратди. Шунингдек, бангладешликларга Саудия қизил яримой жамияти ўттиз миллион, Кувайт ҳукумати ўн миллион, Ливия ва Туркия бир миллион доллардан ёрдам кўрсатишиди.

Покистон олтида самолёт, ўттиз ўринли кўчма шифохона, саксон тўқиз нафар мамлакали мутахассис ва ҳамшира, дори-дармон, асбоб-ускуналар жўнатди.

“Исломий ёрдам”, “Мусулмонларга кўмак” ва бошқа инсонпарварлик ташкилотлари ҳам бир миллион доллардан ортиқ маблағ, озиқ-

овқат, тозалов воситалари ва ичимлик суви етказиб беришиди.

The Muslim News

Ягона валютага ўтишмоқчи

Форс кўрфазидаги Араб давлатлари ҳамкорлик кенгаши раҳбарлари яқинда ўтган учрашувда 2010 йилдан ягона пулни муомалага киритиш ҳақида бир қарорга келишди. Шу мақсадда учрашувда мамлакатлар молия вазири, марказий банклари раҳбарларига миллий валюталарни босқичма-босқич яқинлаштириб бориш режасини тузиш топширилди. Бу ҳақдаги ҳисбот Аммонда бўладиган учрашувда муҳокама қилинади.

Ягона валютага ўтилса, Форс кўрфази давлатларида муаммолар юзага келиши мумкин. Шу боис Аммон лойиҳадан чиқишини маълум қилди. Бирлашган Араб Амирликлари эса 2010 йилдаёқ ягона валютага ўтишнинг иложи йўқ, демоқда.

Lenta.Ru

Уилл Смит рад этади

Америкалик кино артисти Уилл Смитт гўё ўзининг саентологлар мазҳабига ўтгани ҳақида тарқатилган миш-мишларни рад этди. Машҳур актёр бундан бир неча йил аввал мусулмон бўлган эди.

Дўстларининг айтишича, у “Мухаммад Али” филмida бош ролни ижро этиш жараёнида машҳур чарм кўлқоп устасининг эътиқоди, дунёкараши билан ҳам қизиқкан. Унинг нега мусулмон бўлгани ҳақида ўйлаган. Орадан кўп ўтмай Уилл Смит ҳам Исломни қабул қилгани маълум бўлди.

АҚШда бўлган 11 сентябр воқеаларидан сўнг Уилл Смит америкаликларни Ислом ва террорчиликни бир-бири билан аралаштириб юбормасликка чақирган, зўравонлик динимизга буткул ёт эканини англатиш учун жон куйдирган эди.

IslamNews

Ҳожилар асал ялашиди



Малайзиянинг Сейнс университети бир гурух олимлари ўзига хос тадқиқот ўтказишиди. Улар туланг дарахти гул нектаридан олинган асалнинг ҳаж

мавсуми, ҳожилар орасида кўп учрайдиган ўйтал ва дамқисма хасталикларида қандай фойда беришини ўрганишди.

Мазкур лойиҳа директори Қамарулазизий Иброҳим айтишича, тадқиқотлар Уммул Куро (Саудия Арабистони) университети олимлари билан ҳамкорликда амалга оширилган.

Islam.ru

Канслер фикрига кўра

Олмония канслери Анжела Маркел фикрига кўра, мамлакатда қурилаётган масжидларнинг миноралари насронийлар черковлари кўнфироқхоналаридан баланд бўлмаслиги керак.



Хозир Олмонияда уч ярим миллиондан ортиқ мусулмон яшайди. Уларнинг

кўпи Туркиядан келганлардир. Мамлакатда бир юз эллик тўққизта жомеъ ишлаб турибди. Адади тобора ортиб бораётган мусулмон аҳоли эҳтиёжларига биноан яна бир юз саксон тўртта масжид қурилиши режаланмоқда.

Олмония канслерининг фикри танқидга учради. Мамлакат мусулмонлари мувоғиқлаштирувчи кенгашида масжид миноралари мавзудан сайловолди курашида фойдаланишаётгани таъкидланди. “Хозир мусулмонлар ва насронийларнинг миноралар ва кўнфироқхоналар баландлигидан кўра муҳимроқ муаммолари бор” экани айтилди.

Catholic World News, Sign On San Diego

Масжидлар таъмирга муҳтож

Албания, Косово, Македония ва Черногория мусулмонлари Farbий Bolqonda Исломнинг беш асрлик бой тарихи рамзлари бўлмиш кўхна масжидларни таъмиrlаш, келгуси авлодларга сақлаб қолиш учун ёрдам сўраб мурожаат қилди.

Мусулмонларнинг ўз-ўзини бошқариш “Шайқдом” ташкилоти барча хайрия тизимларини ушбу савоб ишга ҳисса қўшишга чақириди. Ташкилот раҳбари ўринбосари Саймир Рушекунинг айтишича, ўтган асрда даҳрийлар ҳокимииятга келишидан олдин Албанияда бир минг олти юзта масжид бўлган. Сўнгра уларнинг кўпи йўқ қилинган. Омон қолган икки юз йигирма бир масжид биноси тезда қайта таъмиrlанишга муҳтож.

“Шайқдом” ташкилоти раҳбари Сабри



Бойфур айтишича, кўхна масжидларнинг икки юз ўн саккизтаси 1998-1999 йилги уруш туфайли вайрон бўлган.

Профессор Муҳаммад Арнаут

масжидлар Болқон тарихида катта аҳамият касб этишини, Албания пойтахти Тирана каби йирик шаҳарлар ҳам бир вақтлар масжидлар атрофида шаклланганини таъкидлади.

Islam Online

Литва тарихида биринчи марта

Литва Республикасида нашр этиладиган “Аёлларга маслаҳатлар”, “Ошхона сирлари”, “Богбонларга маслаҳатлар” номларида ва бошқа шу каби 2008 йил учун чиқарилган йиртма тақвимларда мусулмонларнинг Рамазон ва Қурбон ҳайитлари ҳақида илк бора маълумот берилди.

Асосий байрамимиз ҳақидаги мақолаларни Каунас масжиди имоми Ромас Якубоускас тайёрлаган. Аҳоли орасида машҳур ушбу йиллик йиртма тақвимлар “Календарюс” нашириётида чоп этилди.

“Татар-информ”

Назорат чоралари кўрилади



Кавказ мусулмонлари бошқармаси раисининг ўринbosари Собир Ҳасанли Озарбайжонда миссионерлик ташкилотларининг ҳукуматга қарши фаолиятига барҳам бериш учун алоҳида назорат чораларини

кўриш зарурлиги ҳақида маълум қилди.

Унинг айтишича, “Озарбайжонда турли динлар, конфесиялар мавжуд, юксак диний бағрикенглик йўлга қўйилган. Аммо диний тарғибот баҳонасида хориждаги марказларидан молиявий ёрдам олиб, сиёсий мақсадларда давлатга қарши фаолият юритаётган гуруҳлар борлиги бизни ташвишлантиради”, дея таъкидлadi Собир Ҳасанли.

Интерфакс

ИЛМ КЎЗНИ ОЧАДИ

Етмиш беш ёшдаман. Умрим илмга интилиб ўтди. Илмий лабораторияларда ишладим. Турли юртларда бўлдим. Кўплаб кишилар билан юракдан сұхбатлашиш насиб этди. Кўрган-билигларимни қиёслаб, маълум бир фикрга келдим.

Илм инсонга Аллоҳни осон танитади. Унинг кўзини очади, фикр кўламини кенгайтиради. Шу боис ҳам илмли кишилар Аллоҳнинг кўрсатмаларини тезроқ ва яхшироқ тушунадилар.

Менимча, инсонни Аллоҳни танишга, Ундан кўрқишига, тўғриликка, ҳалолликка жуда эрта, кичик ёшдан ўргатиш керак. Бу масалада отоналар, бобо-бувилар зиммасида катта масъулият ётади. Богча-мактабларда фанларни пухта ўргатиш имонни мустаҳкамлайди.

**Замзам ҚУРБОНОВ,
Багдод туман**

ШАРБАТЛАР ИЧИРИНГ

* Эмадиган болаларга чой бериш тавсия этилмайди. Чой темир моддасининг миқдорини камайтириб, камқонликка сабаб бўлиши мумкин. Бир ёшгача бўлган болалар камқонликка мойил бўлишади. Шу боис болага ҳўл мевалар, резаворлар шарбатини беринг.

* Сунъий толали газламалар (масалан, нейлон, капрон, ворсолон кабилар)-дан либос кийишдан сақланиш керак. Бу газламаларда танага салбий таъсир кўрсатувчи куч – электр майдони мавжуд. Синтетик толалар этилен, бензол, фенол сингари заарли моддалар, нефт газлари ва тошкўмир қатронидан олинади. Улар ички аъзоларга (айниқса, ҳомилага) ёмон таъсир қилиши мумкин. Паҳтали, ипак матолардан тикилган либослар ҳомилани ҳар хил ноҳуш таъсирлардан ҳимоя қиласди.

* Фарзанд кўришни режалаштириб қўйганингиз заҳотиёқ тишларингизни даволатиб олинг. Акс ҳолда носоғлом тишлар орасидан нафақат ўзингиз, балки тугилажак фарзандингиз ҳам жабр кўриши мумкин. Чунки кариес – инфекциялар макони. Тишлар ва милкларнинг касалланиши туфайли ички аъзоларга инфекция тушади. Ҳомиладорлик даврида оғиз бўшлигини жуда тоза ва соғлом сақлаш шарт.



Муҳаммадшокир исмли бир оилавий қадр-донимиз бўларди (Аллоҳ раҳмат қилин). Бир куни уйимиздагилар мени шу кишидан ха-бар олиб келишга юбориши. Ўшанда энди ўн олтига кирган ўсмир эдим. Ҳали дунёниг паст-баландига учалик ақлим етмасди. Сўраб-сурештириб, Муҳаммадшокир аканинг уйини аранг топдим. Наманган шаҳрининг адир қисмида, Шимолий Фарғона каналининг шундоққина ёқасида, шаҳар қабристо-нига туаш Олтитош деган жойда яшар экан.

ҳаётларини, ҳисобсиз бойликларини ҳам кўрдик. Ўзимиз ҳам чиройли уйлар қуришга, рўзгорни қулай қилиш учун турли жи-ҳозлар сотиб олишга, кўпроқ пул топиб, «ях-широқ, фаровонроқ» яшашга рағбат кўрсатдик. Бу рағбатлар тобара кучаяверди, ҳаёти-миз қулайлашиб-яхшиланди ҳам, аммо тур-мушимизда, руҳиятимизда нимадир етиш-маётгандай, кўнглимиз нимадандир тўлма-ётгандай бўлаверди. Бунинг сабабини ора-дан кўп йиллар ўтиб яна Муҳаммадшокир

ОДАМЛАР ОРАСИДА БИР ОДАМ

Суҳбат асносида Муҳаммадшокир ака ҳамма нарсани ҳовлисида етиштиришини, кеч кузда уй ёнидаги боғдан чиққан ҳосилни сотиб, кийим-кечак, рўзғор ашёларининг бир йиллигини ғамлаб олишини гапириб берди. Худди бошқа оламга келиб қолгандай бўлдим. Ўшанда Муҳаммадшокир ака, у кишининг аёли ва икки фарзандига раҳмим келган. Шаҳар қулайликларидан узилиб, мана шундай «ғарибона, фақирона» ҳаёт кечираётганига афсусланганман. Иложисизликдан, бирор касби бўлмаганидан шундай ҳаёт тарзини танлаган бўлса керак, дея тахминлар қилганман.

Орадан йиллар ўтиб, улғайдик. Ҳаётнинг икир-чикирларига ақлимиз етадиган бўлди. Кишиларнинг шоҳона уйларини, фаровон

ота уйига йўқлаб борганимда билдим. Анча қартайиб қолган Муҳаммадшокир ота билан суҳбат қурав эканман, турмушидан мамнунлигини изҳор этиб, тинмай Парвардигорга шукронга айтар, сўнгги соатини интиқлик билан кутар эди.

Шунда мен анчадан бўён излаган нарсами топгандай бўлдим. Мен оддийликдан, табиийликдан узоқлашиб кетган эканман. Безовта қалбим аслиятга қайтишни хоҳлаётган экан.

Муҳаммадшокир отанинг аёли дастурхонга кўйган тандир нон, бир ҳовуч туршак ва жийда, сопол косада ивтилган қатик, олма билан шафтоли гулидан дамланган чой ҳаётимдаги энг тансиқ ва мазали таом бўлган эди.

Кейинчалик ҳам у киши ҳақида кўп ўйладим. Ёлғиз ўғлига атаб икки қаватли, ийгирма беш хонали уй қурган танишимнинг «Ҳали ўзим иккинчи қаватга чиқиб кўришга улгура олмадим», дея зорланганини эшитганимда... Бойлиқдан, ҳашамдан роса тўйган бир уddабуроннинг: «Қишлоқ четига пахса деворли уй қураман, чой чойдишда, овқат ўчоқда қилинадиган бўлади», деган орзуини эшитганимда...лоп этиб ҳаёлимга негадир Муҳаммадшокир ота келавериади.

Шайх Фаридуддин Атторнинг «Мантикут тайр» китобида «Девонанинг дунё ва охират



АДАШИШ БОИСИ

ҳақида айтганлари» деган хикоят бор:

*Кимса бир девонадин
сүрди савол:
Не эмиш ул икки олам
чун хаёл?
Деди: бу икки жаҳон
баланду паст,
Қатра сувдир, бор эмас
ул, йўқ эмас.
Қатрайи сув бўлди аввал
ошкор,
Қатрада акс этди сўнг
нақши нигор.
Ҳар неким сув эрди, кўр
охир ҳисоб,
Гар темирдин эрса ҳам
бўлди хароб.
Борму бир нарса темирдек
қаттиқ ул?
Боқ, ўсал ҳам сув била
ҳосил бўлур.
Ҳар неким ул аввали сув
эрди, бас,
Охри тупроқ бўлиб,
тотгай абас.
Сувда кўргайму киши
сабру қарор?
Сувда тургайму иморат
устувор?*

Одам (алайҳиссалом) замонидан бўён курамиз устида не воқеалар бўлмади, кимлар келиб, кимлар кетмади. Дунёни зир титратиб, ҳаммаёқни қонга ботирган саркардаларни ҳам, қудрати ва бойлигининг исига маст бўлиб, ҳатто худолик даъвосини қилган ҳукмдорларни ҳам, илмига, шуҳратига маҳлиё бўлганларни ҳам кўрди бу кураи замин. Улар орасида Муҳаммадшокир ота каби, бир четда, камтарона, ҳеч кимга малоли келмай, Аллоҳнинг Ўзигагина юкуниб яшаб ўтган одамлар ҳам кўп бўлди...

Закариё ТУРСУН

Нисо сурасининг 114-ояти мазмуни бундай: «**Кишиларнинг кўп яширин сўзлашувларида, агар садака беришга ё бирон эзгулик қилишга ёки одамлар ўртасини ислоҳ қилишга буюриш бўлмаса, яхшилик йўқдир**».

Умму Ҳабиба (розийаллоҳу анҳо) айтадилар: Расулуллоҳ (соллаллоҳу алайҳи ва саллам) бундай дедилар: «Одам фарзандининг ҳамма гапи, агар яхшиликка буюриш ё ёмонликдан қайтариш ёки Аллоҳ таолони ёд этиш бўлмаса, ўзига зиён келтиради, яхшилик келтирмайди».

Мақсадни қисқа ифодалаш мумкин бўлганида гапни чўзиш фазилат хисоланмайди.

Ато ибн Рабоҳ айтади: «Сизлардан олдингилар ортиқча гапни ёқтирилас эдилар. Улар Аллоҳ таолонинг китоби ва Расулуллоҳнинг суннатидан; яхшиликка буюриш, ёмонликдан қайта-ришдан; энг зарур ишларга доир мавзудан бошқа мавзуда гапиришмасди. Сизларнинг ҳар бир амалингизни ёзуб тургувчи улуғ фаришталар – ўнг ва чап елкада ўтирган икки фаришта борлигини инкор

қиласизми?! Динингизга ҳам, дунёнгизга ҳам фойдасиз бўлмаган гапларга тўлиб қолган саҳифангиз кўрсатилганида уялмайсизми?!»

Пайғамбаримиз (алайҳиссалом) дедилар: «Тилини ортиқча сўздан тийган ва молидан ортиқчасини инфоқ қилган киши баҳтлидир» (Багавий ривояти).

Ибн Масъуд (розийаллоҳу анҳу) айтади: «Сизларни ортиқча гапдан огоҳлантираман! Киши эҳтиёж даражасида гапирсинг».

Мужоҳид (розийаллоҳу анҳу) дейди: «Албатта, сўзлар ёзуб борилади. Ҳатто киши фарзандини тинчтиш учун, сенга фалон-фалон нарсаларни сотиб оламан, деса ҳам, ёзуб кўйилади».

Иброҳим Таймий айтади: «Фожир одамнинг тили ҳамиша бўш қўйиб юборилган бўлади».

Олимлардан Язид ибн Абу Ҳабиб айтганлариdek, бу оламда адашиш тинглашдан кўра гапириш суюклироқ бўлиб қолгани туфайлидир.

Фозил
УРГАНЖИЙ



БЕЛАРУС РЕСПУБЛИКАСИ



Майдони: 207600 кв. км.
Аҳолиси: 10,2 миллион киши.
Пойтахти: Минск шаҳри.
Тузуми: республика.
Давлат бошлиги: президент.
Маъмурий тузилиши: 6 та вилоятдан иборат. Йирик шаҳарлари: Гомел, Витебск, Могилев, Гродно, Брест.
Пул бирлиги: беларус рубли.



Милоднинг еттинчи асрда хозирги Беларус ерларида драгович, радимич ва кривич деган славян қабилалари яшашган. Тўққизинчи асрга келиб беларус ерлари Киев Руси таркибига кирди. Илк шаҳарлари Минск, Пинск, Брест эса ўн биринчи асрда барпо қилинди. Шундан кейин феодал тарқоқликлар даври бошланиб, мамлакат бир неча майда князликларга бўлинниб кетди. Ўн тўртинг-

чи асрдан бошлаб барча беларус ерлари Буюк Литва князлиги таркибига кўшиб олинди. 1569 йили эса Полша ва Литва бирлашиб, Реч Посполитага давлатини тузишди ва унинг таркибига Беларусия ҳам кирди. Ўн еттинчи асрдан бошлаб унинг ҳудуди “Белая Русь” номини олди. Кейинчалик Полша ҳудуди бўлиб ташланганида Беларусия ерлари Русия империяси таркибига кўшиб олинди. Биринчи жаҳон урушида Беларусия ерининг ярмини немислар ишғол қилишди. 1919 йили Совет Беларусияси ташкил топди. 1921 йилдаги Рига сулҳ шартномасига кўра, Фарбий Белару-

сия Полша ихтиёрига ўтиб кетди. Бир йилдан сўнг СССР ташкил этилиб, Беларусия ССР унинг таркибига кўшилди. 1939 йилда Фарбий Беларус ҳам қайтадан унга кўшиб олинди. 1991 йил 25 августда СССР парчаланиши натижасида мустақил Беларус давлати пайдо бўлди.

Беларус саноати анча тараққий этган. Автомобилсозлик ва



трактор машинасозлиги, кимё, асбобсозлик, радиоэлектроника, енгил, озиқ-овқат, ҳарбий техника каби тармоқлари маҳсулотлари ҳозир ҳам харидоргир. Қишлоқ ҳўжалигига фалла, картошка, сабзавот, гўшт ва сут етиширилади. Четга қўпроқ машинасозлик ва кимё саноати маҳсулотлари, озиқ-овқат сотади. Хориждан эса энергия ресурслари, саноат хомашёси харид қиласди. Асосан Русия, Украина, Полша, Олмония, Литва билан савдо-иқтисодий алоқалари ўрнатган.

Беларус аҳолисининг 95 физини насронийлар (православ-



ри Екатерина Иккинчи Русия империяси чегараларини кўриклиш учун ёллаган татар жангчиларининг авлодлариридир.

Ишончи манбаларга кўра, татарлар Ивиеда 1395 – 1398 йиллари пайдо бўлишган. Уларни олисанжалновар юришлардан княз Витовт бошлаб келган. Княз за-

монида Буюк Литва князлиги энг қудратга тўлган даврини бошдан кечираётган бўлиб, Ивие унинг таркибиға кирап эди. Татарлар князга содиқлик билан хизмат қилишибди ва бир умрга бу шаҳарни маскан тутиб қолишиди.

Ивиедаги кўхна масжид тарихи ҳам ибратли. Ўн тўққизинчи аср ниҳоясида Ивие қальясининг охирги эгаси полшалик графиня Замойская татарларга анчагина ёғоч-тахтани инъом қиласди. 1882 йилда ана шу тахта-ёғочлардан ҳозирги мас-

жид тикланади. Унинг ёнига силиндр шаклида минора ҳам куришади. Масжид яқинда нализхонлар маблаги ҳисобига яхшилаб таъмирланди. Ҳайит кунлари Беларуснинг ҳамма еридан, ҳатто қўшни давлатлардан мусулмонлар бу масжидга тўпланниб, ибодат қилишади. Курбонликлар сўйилиб, гўшти хонадонларга тарқатилади.

Аҳмад ТУРСУН

Манбалар:

1. «Страны мира», справочник, Москва, 2003 г. стр. 19–21.
2. «Атлас мира», справочник, Москва, 2003 г. стр. 46.
3. Интернет сайтылари.



лар ва католиклар) ташкил этади. Мамлакатда 80 мингдан ортиқ мусулмон яшайди. Бу ерларга Исломнинг кириб келиши ҳақида турли фаразлар бор. Биргина Гродно вилоятидаги Ивие шаҳарчаси мисолида беларус мусулмонлари тарихи ва бугуни билан яқиндан танишиш мумкин.

Ивиенинг етти минг кишилик аҳолисидан минг нафари, бошқача айтсан, 322 оила мусулмон-татарлардир. Шаҳарда уларнинг масжидлари ҳам қўртўкиб туради. Масжид муаззинининг сўзларига қараганда, татарларнинг бу ерда пайдо бўлиши ҳақида бир қанча ривоятлар бор. Баъзи тарихчиларнинг айтишича, улар рус императо-



ТАНИҚЛИ ОЛИМЛАР САФИДА ЭДИ



Үн тўққизинчи асрнинг охирги чорагидан бошлаб, яъни, Туркистон ўлкаларини Чор Русланси босиб олганидан сўнг соф эътиқодли арбоблар ва илгор зиёлилар аста-секин сиёсий таъкидга учрай бошлади. Қатагон қўлинганлар орасида маҳаллий олим ва арбоблардан ташқари, Татаристон ва бошқа ўлкалардан Ўрга Осиёга келиб қолган уламолар ҳам бор эди. Шулардан бири Тошкентдаги масжидлардан бирининг имом-хатиби Ҳасанали Аҳмадёров эди.

Ҳасанали Аҳмадёров 1870 йил 13 февралда ҳозирги Қозогистоннинг Петропавлов шаҳрида савдогар оиласида туғилди. Шаҳардаги мактаб ва мадрасаларда тиришиб ўқиди. Сўнгра масжидларда имом-хатиб бўлиб ишлади. Кейинчалик Ўзбекистонга келиб, Тошкент масжидларида имомлик қилиди. 1934 йилдан Эски шаҳардаги Ҳожи Малик масжидида имом-хатиб бўлди. У 1917 ва 1924 йиллари Уфада ўтган мусулмонлар қурутойларида қатнашди. Татар зиёли ва уламоларидан Абдурашид қози Иброҳимов ва адаб Аёз Исҳоқий, йигирманчи йилларда Бухородан Олмонияга талабалар олиб борган Олимжон Идрисий ва Тошкентдаги таниқли дин арбобларидан Абдувоҳид қори Абдурауфқориев, Заҳириддин Аълам, Камол қози, кейинчалик Ўрга Осиё ва Қозогистон мусулмонлари диний идораси раҳбари бўлиб ишлаган муфтый Зиёвуддин ибн Эшон Бобохон ва бошқалар билан мулоқотда бўлган. Ҳасанали Абдурашид Иброҳимов Мирсарда нашр этган “Ал-Манор”, Туркистонда Абдураҳмон Сайёҳ ва Мунаввар қори Абдурашидхоновлар нашр этиб турган “Ал-Ислоҳ” каби ўзбекча диний матбуот асарларини мунтазам ўқиб борди. У диний-ижтимоий масалалардан баҳс этувчи мақолаларни ўқиб, мулоҳаза қилибгина қолмай, фойдали томонларини бошқа масжидлардаги имом-хатибларга ҳам сўзлаб берарди, уларни топиб ўқишини тавсия этарди.

Совет махфий хизмати ходимлари ундан фойдаланиш йўлларини қидириб, уни Тошкентдаги масжид имомлари ва дин арбоблари ҳақида хабар бериб туришга мажбурлашади. Унга “Понамарёв” деган соҳта фамилия ҳам беришади. Лекин Ҳасанали Аҳмадёров уларнинг топширигини бажармайди ва уламолар ҳақида ҳеч қандай маълумот бермайди. Бу иши махфий хизмат ходимларини ғазаблантира бошлади. Шундан кейин 1936 йил 26 феврал куни Ўзбекистон Ички Ишлар Халқ Комиссарлиги Давлат Хавфсизлик хизмати бошқармасининг

бўлим бошлиғи Матвеев уни чақириб, баъзи бир масалалар бўйича гувоҳ тариқасида жавоб беришини сўради. Ундан: “1934 йил Андижон, Фарғона, Намангандан, Кўқонга Заҳириддин Аълам ва Камол қози топшириги билан бориб келган эдингиз, улардан қандай топшириқ олгансиз ва шу топшириклар бўйича у ерларда қандай ишларни амалга оширгансиз?” деб сўрашганида, у ерларда бўлиши сабабларини очиқ тушунтиради.

Орадан ўн бир кун ўтказиб, у яна гувоҳликка чақирилди. Энди қамоқда ётган Заҳириддин Аълам, Иброҳим Парпи ва бошқалар билан бирга ҳаракат қўлгани ҳақида жавоб беришини талаб қилишди. Бунга Ҳасанали Аҳмадёров Тошкентдаги мусулмон руҳонийлари ичida Қуръон ва диний маросимлар масаласи талқини ва ижросини янгилаш бўйича бир янги оқим борлиги ва унга бир неча таниқли уламолар қаторида ўзи ҳам аъзо эканини айтди (*ЎзССР ДХҚ архиви, П-16634, 13-14-бет*).

Лекин терговчи Ҳасанали Аҳмадёровнинг бу гувоҳликларига ишонмай, унга шубҳа билан қарай бошлайди ва орқасидан айблар қидириб, тухмат материалларни тўплашга киришди. Орадан бир неча ой ўтгач, 1936 йил 31 июл куни ўша вақтлар Ўзбекистон Ички Ишлар Халқ комиссари бўлиб ишлаган катта майор Загвоздин имзоси билан уни қамоққа олишга қарор қилинди. Бунга “диний ташвиқот никоби остида унинг советларга, мавжуд тузумга қарши аксилинқилобий фаолиятда қатнашгани” асос этиб олинди.

Шундан бир неча кун сўнг – 1936 йил 9 августида Ўзбекистон Ички Ишлар Халқ комиссарлигининг Давлат хавфсизлиги бошқармаси 4-бўлимининг ходими Колосов Ҳасанали Аҳмадёров яшаб турган уйда тинтуб ўтказиб, уни қамоққа олди. Ўша куни ёк қамоқ анкеталари тўлдирилиб, унинг оила аъзолари қайд қилинди ва тергов бошлаб юборилди.

Терговчи Ҳасанали Аҳмадёровни “фошқилиш” учун унинг чет эллардаги яқин танишлари билан алоқаларини суриштира бошлади:

“Савол. Сизнинг яқин танишларингиздан кимлар чет элда яшашади?

Жавоб. Менинг ҳозирча чет элда турган яқин

танишларим қуйидагилардир: 1. Ҳозир Мисрда яшаб турган Сайд Рашид Ризаев. Мен у киши билан 1912 йилда Арабистонда ҳаж қылганимда танишган эдим. 1914 йилдан сўнг у киши билан алоқа қылганимй йўқ. 2. 1939 йили яширинча чет элга кетган Мусо Бегиев билан ҳам таниш бўлганман. Ҳозир у кишининг қаердалигини билмайман. У киши билан 1909 йилда танишганимдан сўнг, охириги марта 1924 йилида Уфада мусулмонлар куруттойида кўришдим. Шундан сўнг у билан алоқам бўлган эмас. 3. 1919 йил Колчак билан бирга чет элга ўтиб кетган Аёз Исҳоқийдир. Мен Аёз Исҳоқийни 1919 йилдан танийман, лекин у киши билан ҳеч қандай алоқам йўқ. 4. Олимжон Идрисий билан 1926 йилгача хат орқали доимий алоқа қилиб турдим. У киши билан 1932 йилда вафот этган ўғлим Сайдни Берлинга ўқишига жўнатиш масаласида ёзишган эдим. Лекин ўқиши харажати кўп бўлгани учун юборолмадим. 5. Собиқ Тобол губерниясининг Торо шаҳридан бўлган Рашид Иброҳимов билан ҳам таниш бўлганман. 1917 йил октябр инқилобига қадар Истанбулда бўлган, 1920 йилда қайтиб, 1921 йили яна Туркияга яширинча қайтиб кетган. 1935 йилдан Японияда яшаган. Рашид Иброҳимов билан 1915 йилдан бери танишман, 1921 йилдан сўнг у киши билан алоқам йўқ” (Мазкур архив, 21-бет).

1936 йил 11 августда яна терговга чақирилиб, қўшимча сўроқ-саволга тутишди, тошкентлик бир неча дин арбоби билан алоқалари ҳақида сўрашди.

1936 йил 20 августда терговчи уни яна Советларга қарши тарғибот олиб борганилик айномасини бўйнига қўйишига ҳаракат қилди. Ўша кунги тергов баённомасида ушбу жумлалар бор:

“Савол. Намоз вақтларида советларга қарши тарғибот олиб борганингиз каби айбларни бўйнингизга оласизми?

Жавоб. Советларга қарши тарғибот олиб борган, дея устимга қўйилган айни тан олмайман. Мен фақат сиёсий саводим етишмаслиги туфайли бу борада бъязи бир камчиликларга йўл қўйган бўлишим мумкин.

Савол. Сиз 1935 йил сентябр бошларида боянда бўлганингизда, Японияда турмуш яхши экан, мусулмонларга ҳурмат жойида, деган японпарастлик гапларни гапирганингизни тан оласизми?

Жавоб. Мен Японияда мусулмонлар ҳаёти яхши экан, деган гапга сиёсий тус бермаганман, япон-парастлик ҳақида тарғибот қылганимни инкор этмайман” (ЎзССР ДХҚ архиви, П-16634, 38-бет.)

Кейин ҳам тергов қўйноқлари давом этди. Лекин Ҳасанали Аҳмадёров ўзига қўйилаётган тухмат-айбларни рад этаверди. Охири ҳолдан тойиб, ошқозон касали хуруж қила бошлади. Натижада овқатланиши қийинлаша бошлади. Орадан йигирма бир кун ўтгач, Ўзбекистон Ички Ишлар Халқ комиссариати Давлат хавфсизлиги маҳсус бошқармаси 4-бўлинмаси бошлиги, лейтенант Оғабеков Тош-

кент қамоқхонаси бошлиғига Ҳасанали Аҳмадёров ошқозон саратони билан касаллангани сабабли уни даволаш учун саратон касалларни институтига юборишни топшириди” (Мазкур архив, 101-бет).

Шунга қарамай, 1936 йил 3 ноябрда Ўзбекистон Ички Ишлар Халқ комиссарлигининг маҳсус мажлиси қарори билан Ҳасанали Аҳмадёров уч йил қамоқ жазосига ҳукм қилинди. (Мазкур архив, 110-бет). Қамоқ-сургундан ўн саккиз кун кейин Ҳасанали Аҳмадёров Қозогистондаги касалхоналардан бирида вафот этди.

Орадан бир ҳафта ўтгач, Москвадаги СССР қамоқ-сургун лагерлари бош бошқармаси бошлигининг ўринбосарига Олмаота шаҳридаги сиёсий маҳбуслар қамоқхонаси сургунида бўлган Ҳасанали Аҳмадёров 1936 йил 21 ноябрда шаҳар касалхонасида вафот этгани хабар қилинди (Мазкур ҳужжат, 116-бет).

Унинг вафотидан сўнг оила аъзолари ҳам рўшнолик қўришмади, доимий сиёсий таъқиб ва кузатув остида қўрқиб яшашди. Сталин ўлимидан кейин бир неча йил ўтгачгина бу ҳақда суриштириш имконияти очил бошлади. 1958 йил 7 майда унинг Омск шаҳрида яшаб турган қизи Саида Ҳасанова Ўзбекистон Республикаси прокурори номига отасининг тақдирни ҳақида, унинг ишини қайта қўриб, оқланишига ёрдам бериши сўраб, ариза берди.

Орадан бир ярим ойдан кўпроқ вақт ўтиб Ўзбекистон Олий Суди 1958 йил 28 июнда Аҳмадёров Ҳасаналининг ишини қайта қўриб, унинг устидан чиқарилган 1936 йил 3 ноябрдаги ҳукм айби асосизлиги учун уни бекор қилди. Ҳасанали Аҳмадёров расман оқланди. (Мазкур ҳужжат, 121-бет). Лекин унинг бола-чақалари, ўғил-қизлари, рафиқаси, 68 ёшли касалманд акасининг кейинги ҳаёти ва қисмати қандай кечди, булар ҳақида ҳозирча бирор маълумотга эга эмасмиз.

Шамсиддин Бобохонов Ўрта Осиё ва Қозогистон мусулмонлари диний назорати собиқ радиси, мархум оталари ҳақида ёзган рус тилидаги китобида муфтий ёшлик йилларида тафсир илмини Ҳасан ҳазрат (Ҳасанали Аҳмадёров – Ш.Т.)дан ўрганганини эслатиб ўтган (“Муфти Зияутдинхан ибн Эшон Бабаҳанов. Жизнь и деятельность”. Издательство “Ўзбекистон Миллий энциклопедияси”, Тошкент, 1999 г.).

Собиқ рус империясига қарашли Петропавловскада (ҳозирги Қозогистонда) туғилиб, кейинчалик Ўзбекистонга келган ва Тошкентдаги Ҳожи Малик масжидининг имом-хатиби бўлган ва тақдир тақозоси билан 1936 йилда қамалиб, азобукубатда ўлган таниқли олим Ҳасанали Аҳмадёровнинг ҳаёти ва фаолиятини ўрганиш муҳим тарбиявий аҳамиятта эгадир.

Шерали ТУРДИЕВ,
филология фанлари номзоди

ТУШКУНЛИККА ЎРИН ЙЎҚ!

Атоқли маърифатпарвар Ризоуддин ибн Фахриддин бундай ёзади: «Балоларга сабр қилиш ва қазоларга бўйсуниш бало бўлмайдиган ва қазолар кўрилмайдиган жойга олиб борадиган бирдан-бир йўлдир. Одам боласи қайғу, ҳасрат кўрмай умр кечириши мумкин эмас. Турмуш ва ҳаёт чанглзор оралаб юришдан, машаққат тўлқинлари билан курашиб, сузишдан иборат. Ақлли киши шу мешаққатлардан қўрқмаслиги, келажакдаги роҳатларга умид боғлаб, ушбу мешаққатлардан енгилмаслиги, кўнглини чўқтири-маслиги зарур. Ҳар оғирлик ортидан бир енгиллик келишини Яратганинг ўзи вавда қилиб кўйган. Оқил киши шу вавдани хотирлаб, кўнглини хотиржам қиласди, ўзига тасалли беради. «Бошқа кишилар роҳатда юрадилар, қайгулари йўқ, фамаламли биргина менман», деб гумон қилиш янглиш ва заарлидир...».

Кўпчилик тушкун кайфиятда қолган пайтлари довдираб, мусибатлар кўламини ва охирини ўйлаб ваҳимага берилади. Бир фами ўн бўлади, ҳаётидан файз, турмушидан лаззат кетади. Ваҳоланки, ҳаёт асло бир маромда кечмайди. Тун кунга алмашгани, қиши ўрнини ёзга бўшатганидай, ҳамма нарса навбати билан алмашиб туради.

Яратганинг амрисиз инсонга битта тикан ҳам кирмайди. Соф исломий ақида қалбингизга ўрнашса, иншааллоҳ, балони катта неъмат сингари қабул қила оласиз.

Аллоҳ таоло кимга яхшиликни ирова қилса, унга мусибат юборади. Сизни агар бирор безовталиқ, касаллик, мусибат ёки молиявий инқироз ушласа, бундан фожиа ясад, изтироб чека-

верманг. Аллоҳ ўша нарсани тақдирда битиб кўйган.

Тарих энг яхши ибрат. Ўтмиш воқеаларига тे-ранроқ назар ташланг: ҳатто энг буюк инсонлар ҳам турли бало-мусибатларга, таъна-маломатларга, қийноқ-азобларга дучор бўлишган. Пайғамбаримизнинг (алайҳиссалом) бошларига Макка мушриклари не-не кулфатларни солишмади, қандоқ қийноқларга мубтало қилишмади! Тоифликлар у зотнинг орқаларидан тош отиб, масхаралаб шаҳардан ҳайдаб чиқаришди. Набиралари Ином Ҳусайн қатл этилди. Ином Бухорийдай зот ҳам хўрланди, камситилди, Бухородан ҳайдаб чиқарилди. Иноми Аъзам, Ином Сарахсий ва Ином Аҳмад зиндонга ташланишди.

Сиз қўрқсан, ҳадисираган, олдини олмоқчи бўлган воқеа содир бўлиб қолса, сабрли бўла-веринг. «Ундоқ қилганимда бундоқ-бундоқ бўлар эди, агар анави ишни қилмаганимда, эҳтимол, бунинг олди олиниб қоларди» дегандек соҳта гумонлар қуршовига тушиб қолманг. Фақат «Булар Яратганинг тақдиридир, У хоҳлагани албатта бўлади, хоҳламаган нарсаси асло рўёбга чиқмайди», деган ҳақиқатдан ўзингизга тасалли топинг.

Мусибатларни мардона қарши олсангиз, уларни Яратганинг синови сифатида қабул қилсангиз, бу бирор қилмишменинг жазосимикин ёхуд бирор хатойимга эвазмикин, деб хулоса чиқарсангиз бўлди. Донолар насиҳат қилганидай, мусибатлар кўзга малҳам, дилга кувватдир.

Вилям Жеймс бундай дейди: «Мусибатларимиз биз кутмаган даражада ёрдам беради. Агар Достоевский ва Толстой фожиали ҳаёт кечириш-

маганида асрлар оша қўлдан-қўлга ўтиб ўқиб келинаётган китобларини ёзишмас эди». Ибн Асир «Жомиъул усул» ва «Ниҳоя» номли ажойиб китобларини юра олмай уйда михланиб қолганида ёзган. Имом Сарахсий ўн беш жилдли машхур «Мабсүт» китобини қудуқда ҳибс қилиб қўйишганида ёзган.

Аждодларимиз ҳикоя қилишларича, ўтмишда одамлар бошларига кетма-кет ғам-алам келса, «Ҳали ҳаммаси аслига келади, булар тезда унутилади, бу бизларга бир синов-да», деб хотиржам бўлишар экан. Ҳақиқатан, улар кутганидай соатлар, кунлар ўтгани сайин ғамлар чекинади, дил яралари битади, мусибатлар унутилади.

Бир франсуз олимининг хотираларида ажойиб воқеа тилга олинган: «Биз Жазоир қишлоқларидан бирида илмий экспедитсияда эдик. Бир куни туйқусдан қаттиқ шамол кўтарилиди. Бош кўтаришнинг, кўзни очишнинг имкони йўқ. Ерли аҳоли нима қилиб бўлса-да ўзларини ва мол-мулкларини кутқариб қолишга уринарди. Шамол эса кучайгандан-кучаяр, йўлида нима тўғри келса, пирпиратиб учирив юборар эди.

Шу зайлда кучли шамол бир неча кунгача тинмади. Зарар кўрмаган бирорта хонадон, уй бўлмади. Тирик ҳайвонлардан омон қолганини ҳеч ким кўрмади. Дов-дарахт, экин-тикин ҳақида-ку, гапирмаса ҳам бўлаверади. Умуман қишлоқда ҳаёт асари кўринмас эди. Биз ўзимизча: «Энди аҳоли бу фалокат еридан бошқа жойга кўчиб кетса керак», деб ўйлардик.

Шамол қандай бошланган бўлса, шундай тўхтади. Аммо қишлоқда биз кутган нарсаларнинг бирортаси ҳам содир бўлмади. Ҳеч ким додвой солмади, ҳеч ким бўлиб ўтган фалокатдан, мол-мулкидан ажраганидан, уйи вайрон бўлганидан шикоят қўлмади. Ҳамма яширган жойидан чиқиб, ҳеч нарса бўлмагандек, қолган-кутган нарсаларини йиғиширишга, тартибга солишга киришди. Ҳеч ким кўрилган зарарига афсуснадомат чекмас, қолган нарсаларидан фойдаланиб, ҳаётини қайтадан изга солиши пайдада бўлар эди. Бу оддий, саҳрои кишиларнинг фалокат олдида ўзларини хотиржам тутишлари, содир бўлган ишга ачиниб-хафа бўлмасликлари мени ниҳоятда ҳайратга солди».

Америка анархиячиларининг собиқ йўлбошлиси 2001 йили мусулмон бўлган Абдул Вадуд (Сэм) Хайсмитдан «Исломга киришингизга нима сабаб бўлган?» деб сўрашганида бундай жавоб

берган: «Мен кўп саёҳатга чиқар эдим. Бир гал Мавританияда бўлганимда у ердаги мусулмонлар ҳаёти билан танишгач, мен учун бундан бошқа муносиб йўл йўқлигини англаб етдим. Одамларнинг бир маромдаги осуда турмуши, уларнинг ҳар қандай ҳолатда ҳам тушкунликка тушмай, ҳаммасини тақдирнинг ёзиги сифатида қабул қилишлари, энг кескин вазиятларда ҳам бир-биirlariga газабларини сочмай, яхши муомалада бўлишларини кўриб, ҳар гал ҳайратга тушавердим. Бир гал Нуакшотнинг марказий кўчасида иккита енгил автомобил бир-бири билан тўқнашиб кетди. Ҳайдовчилар ойнадан бошларини чиқариб, табассум илиа бир-биirlariga нимадир дейишди. Тилмочдан сўрасам: «Жонингизга зарар етмадими, Аллоҳ катта фалокатлардан асрасин», дейишган экан. Шунда бу воқеа Нию-Йорк кўчаларида содир бўлганида иккала ҳайдовчи ўзини қандай тутишини кўз олдимга келтирдим: бошда айб кимдалигини ҳал қилиш учун иккови роса даҳанаки жанг қилган, ҳатто ёқалашишгacha борган бўлар эди. Кейин полицияга, суғурта ширкатига кўнфироқ қилишади. Бир неча гувоҳ иштирокида экспертиза ўтказилади. Қанчалаб маблағ сарфиёти, асаббузишлар, судбозлик машмашалари, суғуртчиларнинг қурумсоқлиги... Кўйинг-чи, битта автоҳалокатнинг охирига етишдан кўра янги машина сотиб олиш осонроқ кўчади. Хуллас, мавританияликларнинг осойишта, бир маромдаги ҳаёти қарашларимни тубдан ўзгатириб юборди».

Агар бошингизга ғам-алам тушса, оҳ-воҳ чекиб, зорланиб юрманг. Бошқаларга яхшилик қилинг, атрофингиздагиларга гўзаллик улашинг. Шунда қийинчиликдан тез чиқасиз. Агар сизни ноҳуш ўй-хаёллар ўраб, ҳаётингиз ташвиш-мусибатлар селига кўмилиб кетса, маҳрум-муҳтожларга ҳадя қилинг, мазлумга ёрдам қўлини чўзинг, бошига қийинчилик тушганни балодан кутқаринг, очларни тўйдиринг, касалларни бориб кўринг, жабр кўрганларга тасалли беринг. Шунда ортингиздан ҳам, олдингиздан ҳам саодат-хурсандчилик ўраб олади.

Бузургмехрдан сўрадилар:

— Сен нега қўлингдан кетган нарсага хафа бўлмайсан ва қўлингга келган нарсага шодланмайсан?

У деди:

— Қўлдан кетган нарсани хафагарчилик билан топиб бўлмайди, азиз умрни эса мол-дунё

шодлиги билан беҳуда ўтказиб бўлмайди. Шундай экан, нега энди фойдасиз нарса учун фам чекай, менга бир умр вафо қилмайдиган нарса билан кувонай?!

Аллоҳ сиздан бирор нарсани олса-ю, агар сабр қилисангиз ва савоб умидидаги бўлсангиз, ўша нарса учун сизга эваз беради. Хабарларда: «Кимнинг икки кўзини олсан (яъни, кўр қилиб кўйсан), ўрнига жаннатни эваз қилиб бераман. Кимнинг дунё аҳлидан дўсти (жонини) тортиб олсан, жаннатни эваз қилиб бераман», дейилади.

Ким ўғлини ёки қизини йўқотса ва бунга сабр қилса, абадият диёрида унга атаб мақтов уйи курилади. Агар Аллоҳ сизни фарзанддан қисган бўлса, бунга ҳам сабр қилинг. Чунки У баъзи инсонларни шу йўл билан ҳам имтиҳон қилади. Ёки сизни ҳусндан, бўйдан, мол-дунёдан, қариндошуругдан ёки дўстдан, чиройли хотиндан, уйдан, уловдан, борингки, қайси неъматидан қисган бўлса, асло ўксинманг, тушкунликка тушманг, асабингизни бузиб юрманг. Бу сизнинг камситилганингиз ёки ёқмай қолганингиздан эмас, балки Аллоҳ таоло сизга яхшиликни истагани туфайли дунё синовларига дучор қилганидандир.

Жаъфар АҲСИКАТИЙ

“Одамларга шукр қилувчи одам Аллоҳга шукр қилувчи кишилар жумласидан ҳисобланади”.

Мутафаккир олимларнинг сўзларига кўра, Аллоҳ таолога қилинган ҳақиқий шукр:

1) неъмат берувчи Зотни таниш;

2) неъмат бергани учун дилдан шодланиш;

3) неъматни тегишли ерларга ишлатишдир.

Инсонларга бўладиган шукр эса, уларнинг яхшиликларини билиши ва миннатдорлик билдириб, кўлдан келганича уларга хурмат ва марҳамат кўрсатишдан иборат.

Неъматга шукр қилиш, яхши ахлоқдан бўлиши билан бирга,

латиф бўлганидан ушбу ҳадиси шариф муносабати билан уни баён қиласиз:

Бир мажлисда Расулulloҳ (соллаллоҳу алайҳи ва саллам)

Ҳассон исмли саҳобадан жоҳилият замонидаги шеърларидан ўқиб беришини сўрадилар. Ҳассон Алқима ибн Алоса* кўшиб айтилган ҳажвни ўқиди. Расулulloҳ (соллаллоҳу алайҳи ва саллам) Ҳассонга қараб: “Эй Ҳассон, бундан кейин менинг ҳузуримда бу ҳажвни ўқима!” дедилар.



ЯХШИЛИК ҚАДР ТОПМАСА...

ижтимоий жиҳатдан ҳам муҳимдир. Зоро, ношукрлик туфайли жамиятда кўнгилсиз ҳодисалар келиб чиқиши мумкин. Шукр неъматнинг давомли бўлишига сабаб бўлса, неъматнинг шукрини адо этмаслик унинг кесилишига ва тўхтаб қолишига сабаб бўлади.

Яхшиликнинг қадрига етилмаса, муносабиб баҳоланмаса, моддий ва маънавий рағбатлантирилмаса, одамларнинг эзгу хизматлардан кўнгиллари совийди.

Эзгуликлари ва неъматлари эвазига бирон мукофот умид қилмай, хизматлари қадрини билмаётганларига эътибор бермай, холис Аллоҳ йўлида яхшиликлар қилаётган кишилар ҳам бор. Лекин бундай одамлар жуда ҳам оз. Шу сабабдан Расулulloҳ (соллаллоҳу алайҳи ва саллам) бандаларнинг яхшиликлари, етказган фойдалари ва қилган хизматлари учун шукр этиши лозимлигини ва бу шукр ҳақиқатда Аллоҳ таолога шукр қилиш эканини ҳадиси шарифда баён этдилар.

Шайх Абдул Қодир Журжоний зикр қилган бир ҳикоя жуда ҳам

Ҳассон: “Эй Расулulloҳ, бунда ҳажв қилинган Алқима Қайсар подшоҳи ҳузурида турувчи бир мушриқдир, унинг ҳажв қилинишида нима зарар бор?” деб савол берди.

Шунда Расулulloҳ: “Қайсар мен ҳакимда сўраганида Абу Суфён мени ёмонлашга ҳаракат қилган, Алқима эса мени рост ва яхши тарьиғлаган. Бу яхшилигига мукофот бериш зарур”, дедилар. Сўнг: “Одамларга шукр қилувчи одам Аллоҳга шукр қилувчи кишилар жумласидан ҳисобланади”, деб марҳамат қилдилар.

Ризоуддин ибн ФАХРИДИН

* Алқима Расулulloҳ (соллаллоҳу алайҳи ва саллам) замонларида мусулмон бўлган эди. Қандайдир сабабларга кўра кейин муртал бўлиб, Шомга кетди. Расулulloҳ (соллаллоҳу алайҳи ва саллам) ҳақларида Рум Қайсарига яхши гапларни ўша пайтда айтган. Расулulloҳнинг (соллаллоҳу алайҳи ва саллам) вафтларидан кейин яна Исломга қайтди. Муҳаддислар уни саҳобалар қаторида зикр қилишади.

БИР САВОЛ СҮРАСАМ...

**Саволларга Ўзбекистон мусулмонлари идораси
фатво ҳайъати жавоб беради**



Савол: Ваасваса қаердан келади? Унга қарши курашии учун дуо борми?

АБДУЛАЗИМ,
Шофиркон

Жавоб: Ваасваса – шайтон кўнгилга соладиган ёмон фикрлар ва ўйлардир. Ҳадиси шарифларда шайтон инсоннинг қон йўлларида юриши айтилган. Аллоҳ таборака ва таоло ваасваса туфайли бандани жазоламайди. Пайғамбаримиз (алайҳиссалом) айтганлар: “Аллоҳ таоло умматимни кўнглидаги ўйи учун, уни сўзламаса ёки амалга оширасаса, жазоламайди”.

Саҳобалар Расулуллоҳга (соллаллоҳу алайҳи ва саллам) аҳён-аҳёнда шайтон қалбларига айтиб бўлмас нарсаларни келтиришидан шикоят қилишганида, у зот шайтонни назарда тутиб: “Унинг ҳийла-макрини вавасага буриб юборган Аллоҳга ҳамд бўлсин”, деганлар.

Ваасвасага йўлиқкан киши Аллоҳ жалла жалалуҳу номини зикр этиб, унга қарши курашиши ва ундан холос бўлишга интилиши керак, чунки Қуръони мажидда бундай дейилади: “Агар сизни шайтон бирон вавасаса билан йўлдан оздириб (мазкур хислат эгаси бўлишдан) қайтармоқчи бўлса, у ҳолда Аллоҳдан паноҳ сўранг. Зоро, у эшиг-

гувчи, билгувчи Зотдир” (Фусилият, 36).

Ўзини шайтон ваасваса қилаётганини ҳис этган киши икки “Қул аъзу...” сурасини ва “Оятал курсий”ни ўқиши керак.

Савол: Намоз чогида қайси амалларни қилиш кароҳиятли саналади?

ШУҲРАТ,
Асака

Жавоб: Куйидагилар намоздаги макруҳ амаллар ҳисобланади:

– намозда хушуъсиз, бепарво қилинган ҳар бир амал;

– агар намозхон тупроқда сажда қилган бўлса, намоздан турганида пешонасини тозалаб артиши;

– саждани бош кийими пешонасига тушган ҳолда қилиши. Яъни, бош кийим тўсиб, пешонанинг саждада ерга тегмай қолиши;

– эр кишилар сажда ҳолатида билакларини ерга теккизиши;

– намоз ўқувчи кийимини осилтириб ёки елкасига ташлаб ёхуд йиғиштириб, енгини шимарип олиши;

– олдинги сафда бўш жой бўлгани ҳолда кейинги сафда туриб намоз ўқиш;

– намозхоннинг кийимда, сажда жойида, олд ва икки ён тарафида ҳайвонот ёки инсон сурати бўлиши (лекин бу сурат жуда кичик ёки боши ўчирилган бўлса, зарари йўқ);

– эски иш кийими билан ўқиш;

– намоз ўқиётган пайтида қироатини ва тасбеҳларини қўл билан санаб туриш.

Савол: Айрим намозхонлар кўзларини юмиб намоз ўқишиади.. Шу тўғрими?

МАЪРУФ,
Денов

Жавоб: Йўқ, бундай намоз ўқиш суннатга хилофдир. Пайғамбаримиз (алайҳиссалом) ҳеч қачон кўзларини юмиб намоз ўқимаганлар. Оиша онамиз (розийаллоҳу анҳа): “Расулуллоҳ (соллаллоҳу алайҳи ва саллам) намоз ўқисалар, бошларини эгиб, ерга қараб турар эдилар”, деб айтганлар (*Ҳоким ривояти*). Бошқа бир ривоятда Пайғамбарининг (алайҳиссалом) нигоҳлари сажда ўрнидан нарига ўтмагани нақл қилинган (*Ҳоким ривояти*).

Намозда ҳар бир аъзонинг ўз ўрни бор, шунингдек, кўзники ҳам. Бу ҳақдаги масала фикр китобларимизда батафсил ёритилган. Яъни, қиёмда сажда ўрнига, рукуда оёқлар орасига, саждада бурун учига, қаъдада кўкракка қараб турилади.

Уламолар кўзни юмиб намоз ўқишини Расулуллоҳ (соллаллоҳу алайҳи ва саллам) амалларига терс бўлгани учун макруҳ санаштан.

Ҳайъат раҳбари
Абдулазиз МАНСУР

Садриддин САЛИМ БУХОРИЙ

Ошиқмисан ва ё ўткинчи?..

(Ҳажс дафтаридан)

1

Байтуллоҳга ёпишган сайин
Қалбим эриб кетмоқда сим-сим.
Дардим ёлғиз сенга айтяпман,
Сенга айтмай кимга айтайин...

Барча сирдан воқиф Зотдирсан,
Оёқсизга Сен қанотдирсан.
Қодир, Басир ҳам Ҳаётдирсан,
Сенга айтмай кимга айтайин...

Гуноҳларим тоғ каби, ё Раб!
Дардли қалбим соғ каби, ё Раб!
Яшнат мени боғ каби, ё Раб!
Сенга айтмай кимга айтайин...

Ҳаммадан мен ёмонман, ёмон,
Лекин бугун мен Сенга меҳмон.
Гуноҳдан пок айлагин, Султон!
Сенга айтмай кимга айтайин...

2

Иброҳим бу эмас ўтинчи,
Баҳоуддин қалблар севинчи.
Шулар каби келибсан, айт-чи,
Ошиқмисан ва ё ўткинчи?

Улугбекка насиб этмади,
Алишербек унга етмади.
Не даҳолар таклиф кутмади?
Ошиқмисан ва ё ўткинчи?

Каъбатуллоҳ висол маскани,
Ошиқларга жамол маскани,
Бегонага хаёл маскани,
Ошиқмисан ва ё ўткинчи?

Кўзёшларинг жола бўлдими?
Тавбаларинг нола бўлдими?
Дил ошиқи вола бўлдими?
Ошиқмисан ва ё ўткинчи?

Булҳаваслар келар-да кетар,
Дема улар мақсадуга етар,
Бу Каъба чин ошиқни кутар,
Ошиқмисан ва ё ўткинчи?

3

Бу тоғларнинг кўзлари бор,
Пайғамбарни кўргандир!

Бу тоғларнинг сўзлари бор.
Набийдан ҳол сўрагандир.

Бу тоғларнинг қалби бордир,
Қалби жуда мулоим,
Расул учун кўзи чордир,
Расулни севган доим!

Тоғу тошлар Пайғамбарни
Таниб келтирди имон,
Лек мушриклар Пайғамбарга
Ташланди мисли илон...

Гарчи Ислом бир қўёшдир,
Мўминларга аён нур,
Мушрикларнинг қалби тошдир,
Мушрикларнинг кўзи кўр!

Бу тоғларнинг кўзлари бор,
Пайғамбарни кўргандир!



Ҳабиба БУРҲОН қизи

* * *

Бу дунёни бир япроқقا ўхшатаман,
Жисму жоним ер-тупроқقا ўхшатаман.
Бир инсоннинг ҳаётга келиб-кетишин
Ёниб ўчган нур-чақмоқقا ўхшатаман.

Ўзингга юзландим

Гоҳида онам ҳам билмаса дардим,
Барча менга боқса бепарвою жим.
Сездирмай йиғласа армонли қалбим,
Ўзингга юзландим, яратган Раббим.

Баҳорим келди-ю, гуллаёлмадим,
Кўёшим кулди-ю, нурга қонмадим.
Бошим тошга тегиб, унсиз йиғладим,
Ўзингга юзландим, яратган Раббим.

Боғларимда унди на гул, на ниҳол,
Меҳнатдан қоматим букилди беҳол,
Ёдга олдим Сени, тикландим дарҳол,
Ўзингга юзландим, яратган Раббим.

Галлаорол



Тўра МИРЗО

Пайғамбар (алаиҳиссалом) мұжжизалари

*Фарид бирла етимга мурувватлиғ Мұхаммад,
Йўлдин озғон гумроҳга ҳидоятлиғ Мұхаммад.
Мұхим тушса ҳар кимга, кифоятлиғ Мұхаммад,
Абу Жаҳл, Бу Даҳабга сиёсатлиғ Мұхаммад.*

Ахмад Яссавий

* * *

“Аллоҳу акбар” саси
Сарҳадларни кучарди.
Набийнинг хуш нафаси
Күш мисоли учарди.
Бу нафасдан рух тиниб,
Аллоҳ исмін танирлар.
Шайтоннинг илки синиб,
Раҳмон дәя ёнурлар.
Аллоҳ дейди огоҳлар
Сажды учун эгилиб.
Эгилган сайин қалқар
Буюк бўлиб, тик бўлиб.
Пайғамбар пайғомидан
Юксак муслим ҳаваси.
Ёлғиз Аллоҳ номидан
Расулнинг мұжжизаси.

* * *

Расуллоро мўл юрган,
Тошлоқ, ботқоқ йўл юрган.
То ниятга еткунча
Сахро юрган, чўл юрган.
Аллоҳ ҳамроҳи эди,
Дуо ардоғи эди.
Тиканли йўллар ҳатто
Аллоҳнинг боғи эди.
Ҳазрат алайҳиссалом
Муслимга салом берар.
Ҳофизаси батамом
Аллоҳдан қалом терар.
Офтоб жазирасида
Кезса чўлу биёбон.
Пайғамбар тепасида
Булут бўлар соябон.

* * *

Пайғамбарнинг кўзлари
Ўткир эди, нур эди.
Кўзларида сўzlари,
Минг ҳикмат зуҳур эди.
Расуллоро тикилса,
Тиф тутган ёғий қулар.
Баланд тоққа тик келса,
Тоғ оҳ уриб йиқилар.

Меҳр билан боққанда
Гул сочилар хайридин.
Дуо қиласар чин қалбдан,
Муслим бўлар файридин.
Кўз билан узар ўзи
Душманлар тортган сафни.
Набийнинг икки кўзи
Кўради тўрт тарафни.

* * *

Пайғамбар манглайини
Нурлар макон айламиш.
Нурнинг аъло, майини
Пешонасин бойламиш.
Чанг-тўзонда қолса ҳам
Юз-кўзига инмас гард.
Ёвлар ўраб олса ҳам
Толмас, тоймас,

синмас мард.

Кутлуг пешонасидан
Тер томганда тиконга
Гул ўсди бир расида,
Чўл восилдир бўстонга.
Гуллар хушбўй, анвойи,
Даста-даста сайланар.
Вобаста гулга пойи,
Жой гулзорга айланар.

* * *

Пайғамбар отса одим
Яқинлаб келар олис.
Оёғини кўйган зум
Мулойимдир дала-туз.
Ҳалимдай юмшар
ҳарсанг,
Бермаслик учун озор.
Бир одимдай минг
фарсаҳ
Йўл бўшатар баҳтиёр.
Мағриб унга бир қадам,
Бир одимдир Машриқ-да.
Изидан чопар гул ҳам,
Набийга ул ошиқ-да.
Пахтадай момиқ бўлар
Қадим тошларнинг кафти.

Йўлда чечак кулар:
Пайғамбар келаяпти...

* * *

Пайғамбар қилсалар жаҳд,
Сўфишда фозий бўлар.
Сафда турса тумонат,
Набий дарози бўлар.
Расуллоро қаломи,
Ҳадиси, уйи баланд.
Офтоб берар саломин,
Набийнинг бўйи баланд.
Муслимга Расуллоро
Имондан сўйлаб турар.
Тиз буқару баланд тоғ
Пайғамбар бўйлаб турар.
Эшитган эл эгар бош
Муборак Набий номин.
Саждага чўкар қўёш,
Аллоҳу акбар... Омин...



Фармонқул РАСУЛОВ

* * *

Тупроқдин яралмиш аслида инсон,
Охири тупроққа қайтар бегумон.
Раббим ризосига эришмоқ учун
Ихлос ва ибодат ягона имкон.

* * *

Душманингиз ким деб

сўрсам атайнин,
Дейишар: у баттол шайтони лаъин.
Фақат ким нафсини этмаса мағлуб
Шайтон йўриғига юрмоги тайин.

* * *

Майсалар ютаркан заҳарли газни
Инсонга қайтарар ҳаёт нафасин,
Ажаб, гоҳ инсонга яхшилик қилсанг,
Юракка санчади заҳар найзасин.

* * *

Сўзамол бир киши узоқ сўйлади,
Ҳамма ишонди деб хато ўйлади.
Аслида тўғри гап қисқа бўлар-ку,
Ўзни доно билиб, хато айлади.

Китоб шаҳар, “Хожа Бухорий” Ислом
ўрта-маҳсус билим юрти



Доктор Мехмет ОККУШ,
Анкара университети профессори, турк-ислом адабиёти
Онабилим бўлими бошлиги

ЎЗБЕКИСТОНДАН ОНАДЎЛИГА ИЛМ-ИРФОН ҲАРАКАТИ

Милодий XI асрда Онадўли ерларига кирган турклар янги ўрнашган ҳудудларида маҳаллий аҳоли билан баъзи маданий ва диний масалаларда тортишувлар қила бошлаши. Кўч-кўронлари билан келган бу турклар фақат қишлоқ хўжалиги, экин-тикин ва чорва соҳасидагина эмас, айни пайтда янги маданиятни юзага келтириш борасида ҳам ҳаракат қилишарди. Хуллас, Хуросон диёри дея аталувчи заминдан неча-неча дарвешлар, олимлар ва алплар шундай фаолият учун Онадўли тупроқларига оқиб келдилар. Онадўлига кўчиб келгунча ҳам турклар орасида Ислом яхшигина ўрнашиб олган ва ўша пайдаги мадрасаларда мусбат илмлар соҳасида анча-мунча ютуқларга эришилган эди. Шунга қарамасдан кўнгил сultonлари ҳисобланган бир неча мутасавифлар ўзлари тарбиялаб, вояга етказган муридларини фақат гарбга йўллашар эди.

Албатта, бу хил ҳижратга баъзи сиёсий воқеалар ҳам сабабчи эди. Натижада Онадўлининг кўп шаҳарларида одамлар янги хизмат даргоҳларига эга бўлишиди.

Онадўлининг янада исломлашувида муҳим ўрин тутган бу хил фаолиятлар тўғрисида каттагина мақола ёзган Умар Лутфи Барқан ҳижрат қилган дарвешлар ҳақида бундай дейди:

«Балх, Бухоро ва Хуросон томонларидан неча-неча эранларнинг (авлиё зотларнинг) келиб, бу ерларни ватан тутишларида кўп маънолар бор. Масалан, қабри Бурсада жойлашган Шайх Абдол Мурод Хуросон эранларидан бўлиб, Бурса фатҳида қатнашган. Шайх Айдол Мусо Яссавий фу-

қаросидандир ва ҳожи Бектош ила Румга келмишdir. Амир Султон ҳусайнин насабдур. Бухорода туғилган, вояга етган Шайх Кийикли Бобо Султон ҳам фуқаройи Яссавийдандир»¹.

Шарқ ва гарбдан Онадўлининг турли музофотларига кўчиб келиб, бу ерлик ҳалқнинг дини ва маданияти ривожига катта таъсир кўрсатган шахсиятлардан баъзиларини санасак, булар Аҳмад Яссавий, Муҳиддин Ибн Арабий, Мавлоно Жалолиддин Румий, Сайид Яҳёи Ширвоний, Луқмон Паранда, Дада Қарчин ва бошқалар.

Онадўли диний ва маданий ҳаётининг ўзгаришига, инсонларнинг Ислом маданияти билан танишиб, бу маданиятнинг тараққий топишида айниқса Ўзбекистон диёрининг илм, фикр ва тасаввуф арбобларининг таъсири катта бўлган.

Муридлари билан Онадўли ҳудудида катта ишлар қилган эранларнинг йўлбошчиси Аҳмад Яссавийдир. У маълум муддат Бухорода яшаган, Юсуф Ҳамадонийга шогирд тушиб, маънавий камолот дарсларини ундан олди. Устози вафотидан кейин унинг ўрнига иршод фаолиятларини давом эттирди. Таълимими Бухорода якунлади. Аҳмад Яссавийнинг бир қанча муридлари бўлган.² Шу халифаларидан Луқмони Паранда вояга етказган ҳожи Бектоши Вали ҳам (1281-1338) Онадўлига кўчиб келган эранлардандир. Бу зотнинг Онадўли ва Рум элига таъсири ниҳоятда катта бўлди. Вафотидан сўнг бектошийлик мактаби юзага келди.

Асли бухоролик бўлиб, Онадўлига ҳижрат қилганлардан яна бири Ҳасан Ҳусомуд-

дин Ушоқдир. Бухоро музофотида 1475 йили дунёга келган бу зотнинг отаси тижорат билан шугулланарди. Ҳасан Ҳусомуддин зоҳирӣ илмларни отасидан олди. Отасининг вафотидан кейин кўрган бир тушида унга бундай дейилди.

«Тижоратнинг одамга машаққат ва қийинчилик берувчи фойдасиз ташвишлари асосан ҳақиқат аҳли учун заарли ишлардандир. Агар сен охират саодатини истасанг, бу дунёнинг сон-саноқсиз ва фойдасиз машғулотларидан юз ўгир ва Оналўидаги Ушоқ шаҳрида яшовчи Шайх Амир Афандига талаба бўлгин, ундан маънавий таълим ол».

Тушда Шайх Амир Афанди дея тилга олинган зот аслида Аҳмади Самарқандий исми билан машҳур зотdir. Ҳозир қабрлари Ушоқнинг Қибокли шаҳридадир.

Ҳасан Ҳусомуддин Аҳмад Самарқандий хузурида таълим олиб, камолотга етди ва у зотнинг вафотидан сўнг хизматини давом эттириди. Бу ерда амалга оширган илм таҳсиллари ва маънавий иршоди атрофдаги музофотларга ҳам танилди. Чунончи, ўша пайтларда Маниса вилоятига волий бўлган Усмонли шаҳзода Мурод Учинчи у билан кўришган, подшоҳ бўлганидан кейин эса, уни Истанбулга чақириган. Истанбулда у учун турар жой, масjid ва такка куриб берди. Ҳасан Ҳусомуддин Афанди Ҳижоздан қайтаётганида 1593 йили вафот этган. Кейин ҳам юзлаб шогирдларининг турк халқи ичida таъсири кучли бўлган.³

Фотиҳ Султон Меҳмед ҳам илм, адабиёт ва дин олимларига рағбат кўрсатувчи, уларни қўллаб-қувватловчи подшоҳ эди. Ўз даврида бир неча олимларни Истанбулга чақириб олган. Булар орасида асли самарқандлик бўлган машҳур астроном Али Кушчи ҳам бор. Математика ва астрономия соҳасида бутаниқли олим Фотиҳнинг таклифига биноан Истанбулга келди, бир шогирд чиқаргач, 1474 йили шу ерда вафот этди.

Усмонли ва турк жамоатида неча асрлардан бери маънавий таъсирини ўтказиб келаётган мутасаввифлардан бири Баҳоуддин Нақшбанд (1318–1389)дирлар. У киши исмлари билан аталувчи тариқат ҳали ҳам давом этмоқда.

Фотиҳнинг тасаввуф арбобларига, хусусан, Убайдуллоҳ Аҳрор ҳазратларининг му-

таносибларига (муридларига, талабаларига, у зотга эргашувчиларга.-Тарж.) муҳаббати баланд эди. Чунончи, ҳожа Исҳоқ Бухорий учун Истанбулда такка қурдирган.⁵ Истанбулга нақшбандийликни олиб келган Мулла Илоҳий (897 йилда вафот этган) эса, асли симовлик бўлса ҳам, маънавий камолотга Самарқандда, Убайдуллоҳ Аҳрор ҳузурларида етишди. Самарқанддан халифаси Сайид Аҳмад Бухорий билан бирга Симовга қайтди ва маълум вақт бу ерда туришди. Аҳмад Бухорий Фотиҳ замонида, Мулла Илоҳий эса Фотиҳ вафотидан сўнгра Истанбулга кўчиб келишган.



Истанбулда яна бир Амир Аҳмад Бухорий (1516 йили вафот этган) учун ҳам такка курилган. Буларнинг ёнидаги Ҳожа Убайдуллоҳ Аҳрорнинг невараси Ҳожа Файзуллоҳ Афанди ҳам Тошкентда туғилиб, Истанбулга келган табаррук зотлардандир.

Туркчадан
Мурод ТИЛАВ
ўгирди

1 «Истило даврининг колонизатор турк дарвешлари ва зовийалар», «Тасаввуф китоби» нашриёти, 2003, 141–191-бетлар. Бу дарвешлар ва илм мансублари қандай фаолият юргизгани ҳақида батафсил маълумот олиш учун қаранг. Решад Ўнгурген «Усмонлида сўфийларнинг фарқли жамоатлар билан муносабатлари» «Ислом тадқиқотлари», журнали, 1999, №3, 9–22-бетлар.

2. Dr. Fuad Kopyru. «Turk adabiёtiда ilk mutasavviflar», Диёнат ишлари бошқонлиги нашрлари, Анқара, 1991, 174–180-бетлар.

3. Қаранг: «Ҳусомиддин Ушоқий», доктор Маҳмуд Аккучи.

4. Қаранг: Қосим Куфрали, «Мулла Илоҳий ва кейинги Нақшбандийя муҳити», «Тасаввуф китоби» (Нашрга тайёрловчи Жамил Чифти) нашриёти, Истанбул, 2003, 42–64-бетлар.

СОЛИҲ ЗОТЛАР НАЗАРИ

Алишер Навоий «Лисонут тайр» охирида достонни ёзиш сабабига тўхталиб, болалик хотиралига берилади. У болалигига Фаридуддин Атторнинг «Мантиқут тайр» достони завқи билан хушҳол, «қуш тили бирла кўнгли ҳамроҳ» бўлганини эсга олади. Китоб унинг хилватдаги сирдошига айланади. Шу китобга ошуфталик Алишерни сирли бир ҳолатга туширади; бирор билан гаплашмайди, бошқалар билан муомала-муноса-бати узила бошлайди. Бу ҳолдан хабар топган отаонаси унга «Мантиқут тайр» ўқишини ва у китоб билан машғул бўлишни тақиқлашади. Бироқ бу тадбирнинг фойдаси бўлмайди. Чунки Алишер китобни ёд олган, ҳар вақт такрорлар эди.

Гарчанд Алишер Навоий жаҳон адабиёти дурданалари даражасидаги «Хазойинул маоний», «Хамса» каби юксак савияли бадиий асарлар ёзган бўлса-да, болаликда бошланган «Аттор дўкони»га харидорлик шоирга умр бўйи тинчлик бермайди. Аллоҳ ёрдам берса, «қуш тилини шарҳлаш»ни, «таржима расми била» бир асар ёзишини кўнглига тугади. Шоир бу ишга ёши олтмишга қадам қўйганида мувваффақ бўлади. «Мантиқут тайр» таъсирида унга назира этиб, 1499 йили ёзилган «Лисонут тайр» шоир кўнглида, бадиий тафаккурида бутун ҳаёти давомида пишиб етилган эди.

Алишер Навоийнинг «Лисонут тайр» достони рамзий асар. Унда «қуш тили ишорати билан

ҳақиқат асрори мажоз суратида» баён қилинади. Достонда жуда кўп ибратли ҳикоятлар, пайғамбарлар, авлиёлар қиссалари келтирилган. Алишер Навоийнинг чин мусулмон ижодкор, қалами билан динга хизмат қилиб, бошқаларни ҳам эзгуликка, тўғри йўлга чорлаётган шоир сифатидаги фазилатлари «Лисонут тайр»да ҳам яққол намоён бўлган. Зоро, ўзини англаш, ўз оламига назар ташлаш, аниқроғи, нағсини таниган Аллоҳни танийди, деган гоя «Лисонут тайр» достони мазмунига чукур сингдирилгандир.

Маълумки, достонда кушлар сўзлайди. Сюжет воқеалари Ҳудҳуд воситасида бошқариб борилади. Ҳудҳуд кушлар мажлисида ўзларига подшоҳлика лойиқ қуш – Семурғдан сўз очади, уни излашни, унинг даргоҳига боришни кушларга таклиф қиласди. Аммо йўлбошчилик масаласи муаммо. Шунда йўлбошловчи танлаш бўйича қуръа ташланади. Қуръа Ҳудҳуд номига чиқади. Дарҳақиқат, Ҳудҳуд бошқа кушлардан фарқли, боши тожли, ақлли-хушли, оқил эди.

Савол туғилади: хўш, нега Аттор ҳам, Навоий ҳам айнан Ҳудҳудни йўл бошловчи сифатида танлайди?

Ҳудҳуд аввал йўлбошловчиликка рози бўлмайди. Чунки бу ишнинг масъулияти катта. Ҳамса-фарларининг барча мاشаққатларини баравар тортиши, уларнинг ҳолидан хабардор бўлиб бориши, қолаверса, йўлда иккиланиб қолганлар



кўнглини кўтариб, уларнинг барча жумбоқларига жавоб бера олиши керак. Ҳудҳудда шундай сифат бор эди. Энг муҳим жиҳати – у Сулаймон (алайҳиссалом) билан сұхбатлашган қуш. Буни қушларнинг ўзи эътироф этади. Сулаймон (алайҳиссалом) билан Ҳудҳуд воқеаси Намл сурасида келади.

Алишер Навоийнинг «Тарихи анбиё ва хукамо» асарида Ҳудҳуднинг сув бор жойларни билиши таърифланади. Сулаймон Ҳудҳудни излаб қолади. Тополмайди. «Агар ҳозир келса, жазолайман», дейди. Шунда Ҳудҳуд кириб, бир ҳабар келтирганини айтади. Сабаб деган мамлакатда Билқис исмли аёл подшоҳ, унинг қавми Күёшга топинишини маълум қилади. Сулаймон (алайҳиссалом) ботил эътиқоддаги қавмни ҳидоятга чорлаб, мактуб ёзди ва уни Ҳудҳуддан бериб юборади. Билқис ҳидоят топади.

Қушлар Ҳудҳудга мурожаат қылғанларида ана шу тарихни эсга олишади.

Бунда энг муҳим жиҳат Ҳудҳуднинг Сулаймон (алайҳиссалом) назарига тушган қуш эканидир. Достоннинг бошқа бир ҳикоясида қушлардан бири мавқелар, мақомлар масаласида «яширин сирлардан» воқиф бўлган Ҳудҳуддан сўрайди:

*«...Тенгдурур чун боримизга болу пар,
Сен нединсен боҳабар, биз – бехабар?»*

*«Бу тафовутни саросар шарҳ қил,
Ким нединдор, бизга равшан айлагил...»*

Шунда Ҳудҳуд жавобининг аввалидаёқ: «Ким менга тушмиш Сулаймоннинг кўзи», дейди.

Аллоҳ инояти билан, Сулаймон (алайҳиссалом) назари туфайли, Ҳудҳуд ҳол топгани аниқ.

Айнан бошқа қушлардан назаркардалиги билан фарқланиб тургани учун Ҳудҳудни Аттор ҳам, Навоий ҳам қушларнинг сардори сифатида танлайди.

Сулаймон назари боис Ҳудҳуд руҳониятида пайдо бўлган ҳол асосини яна ҳам таъкидлаш учун Алишер Навоий итга назари тушган Нажмиддин Кубро тўғрисидаги ривоятни келтиради.

Нажмиддин Кубро улуғ аллома етмиш беш ёшли қария бўлишига қарамай, мўғул аскарларига қарши аёвсиз курашган чин ватанпарвар, кўплаб олимлар тарбиялаган назари ўткир авлиё зот сифатида мумтоз из қолдирди.

Алишер Навоий «Насойимул муҳаббат» асарида бундай ёзди: «Кунятлари Абдулжанобдур

ва отлари Аҳмад ибн Умар Хевақий ва лақаблари Кубродур. Ва дебдурларки, аларға Кубро андин лақаб бўлдики, йигитлик авонидаким, зоҳир улуми таҳсилига машғул этмишлар, ҳар ким билаким, мунозара ва мубоҳаса қылсалар эрмиш, ул кишига голиб бўлурлар эрмиш... Ва аларни Шайх Валитарош ҳам дебдурлар. Онинг учунки, важду ҳол ғалобатида муборак назарлари ҳар кимга тушса, валоят мартабасига етар эрмиш...»

Сўнгра Навоий ит билан боғлиқ ривоятни келтиради: «Бир куни ул ҳазрат мажлисида Асҳоби Қаҳф аҳволининг тақрири ва таҳқиқи ўтар эрди. Шайх Саъдиддин Ҳамавий қоддасаллоҳу сирруҳуки, ҳазрат Шайхнинг асҳобидинур, хотирига ўттиқим, оё, бу умматда андоқ киши бўлгаймуқим, сұхбати итга асар қилғай? Ҳазрат Шайх каромат нури била маълум қилдилар ва қўпид хонақоҳ эшигига бориб турдилар. Ногоҳ бир ит етишди ва қўйргун тебратадур эрди. Аларнинг муборак назарлари ул ит сори тушди. Филҳол баҳшиш топиб, мутаҳайирир ва беҳуд бўлди ва бошин ерга суртар эрди. Дебдурларки, ҳар ён борса, келса эрди, эллик-олтмишқа яқин ит они эришиб, ондин айрилмаслар эрди ва (ҳеч) қайдада сокин бўлса, теграсида ҳалқа уруб, иликларини илик устига қўйиб, ун чиқармаслар эрди ва нима емаслар эрди ва ҳурмат била туришар эрди (17-жайл, 287–288-бетлар).

«Лисонут тайр»даги «Шайх Нажмиддин Кубронинг сўзи ва итга тушган кўзи ҳақида»ги маҳсус бобда ана шу воқеа баён қилинади.

*«...Еткуурур итга натижса ул назар,
Зотига солур кишилиқдин асар.»*

*«Итгаким етгай валидан тарбият,
Кушқа ҳам тонг йўқ набидан тарбият...»*

Бир валий зот назари туфайли итда «мақом» ҳосил бўлган экан, Сулаймон пайғамбар назари тушган Ҳудҳуднинг бошқа қушларга пешво бўлиши шубҳасизdir.

Кубронинг ити билан боғлиқ ҳикоя Навоийнинг мумтоз адабиётда анъанавий воқеалар тизимиға қўшган янгилигидир. «Мантиқут тайр»да бу воқеа йўқ.

Хуллас, Алишер Навоий қуръоний қиссалардан, ўтган пайғамбарлар, авлиёлар тарихига оид манбалардан жуда ўринли фойдаланган.

Баҳодир КАРИМ,
филология фанлари доктори

Холид Мұхаммад Ҳолид

АСМО БИНТИ ЯЗИД



Асмо бинти Язид ансория аёллардан бўлиб, кучли имон, сабр, шижаот, ақл эгаси эди. Унда хотирлаш, таъсирчан гапириш, чиройли ўқиши қобилияти мужассам эди. У бизга Расууллоҳ (соллаллоҳу алайҳи ва саллам) ҳақларидағи қиссаларни ўзига хос усул билан етказиб берганлардан биридир.

Иbn Ҳожар бундай дейди: “Асмо бинти Язид ибн Саккон ибн Рофеъ ибн Имриул Қайс ансорлардан бўлиб, авс қабиласининг ашҳал уругидандир. “Умму Омир” ва “Умму Салима” кунялари бор”.

Асмонинг Қуръони карим оятларини, ҳадиси шарифни ўрганишта иштиёқи кучли эди.

Пайғамбаримиз (соллаллоҳу алайҳи ва саллам) саҳобалар даврасида ўтирганларида Асмо бинти Язид ҳузурларига келди ва: “Отам, онам сизга фидо бўлсин, эй Аллоҳнинг элчиси! Аёллар номидан келдим. Улар сўзимни маъқуллашади. Аллоҳ таоло сизни эркагу аёлга пайғамбар қилган. Биз аёллар ҳомиладор бўламиз. Эркаклар жамоат намозларида иштирок этишади. Ҳамда Аллоҳ ўйлида сафарга чиқиш билан даражалари юксалади. Қачон сафарга кетишса, биз уларнинг болаларини ва молларини қўриқлаймиз. Айтинг-чи, савобда улар билан тенг бўлоламиزم?” деб сўради. Шунда Пайғамбаримиз (соллаллоҳу алайҳи ва саллам) саҳобаларга: “Дини ҳақида яхши савол берган аёлнинг сўзини эшитдиларингми? – дедилар. Сўнгра яна Асмога юзланиб: – Эй Асмо, ортингдаги аёлларга билдири, улардан қайси бири эрига яхши хотин бўлса, унинг розилигини истаб яхшиликларига эргашса, барча савобда эри билан билан тенг шерик бўлади”, деб марҳамат қилдилар.

Асмо бинти Язид (розийаллоҳу анҳа) бундай ривоят қилади: “Бир куни тенгдош аёллар орасида турган эдим. Ёнимиздан Расууллоҳ (соллаллоҳу алайҳи ва саллам) ўтиб қолдилар. Бизларга салом бериб: “Куфррони неъмат қилишдан сакланинглар”, дедилар. Сўрашга журъатлироғи мен эдим. “Ё, Расууллоҳ, куфррони неъмат нима?” деб сўрадим. У зот марҳамат қилдилар: “Сизлардан бирингиз ота-онаси билан яшайди. Сўнгра Аллоҳ таоло унга эр берса, эридан фарзанд ато қилса, у фазабланади. Ҳатто унга: «Мен сендан ҳеч яхшилик кўрмадим», дейди”. Бу воқеа аёлларга Пайғамбаримиз тарбияларининг бир кўриниши эди.

Амр ибн Қатода (розийаллоҳу анҳу) ривоят қилади: “Расууллоҳга (соллалоҳу алайҳи ва саллам) энг биринчи байъат берган аёллар Умму Сайд, Кабашата бинти Рофеъ, Умму Омир (Асмо) бинти Язид ибн Саккон ва Ҳаво бинти Язид ибн Саккондир”.

Асмо биринчи байъат қилганидан фахрланиб: “Мен Расууллоҳга байъат қилган аёлларнинг биринчисиман”, дер эди.

Абу Наим Асмонинг байъат ҳақида бундай деганини келтиради: “Расууллоҳ ҳузурларига байъат қилиш учун келдим. Иккита тилла билагузугим бор эди. У зот (алайҳиссалом) марҳамат қилдилар: “Эй

ЗАЙТУН ЁФИ ХОСИЯТЛАРИ

Асмо, Аллоҳ таоло сенга ўтдан билагузук кийдиришидан кўрқмайсанми?” Иккисини ҳам ташлаб юбордим. Уларни ким олганини билмайман”.

Ибн Абулбар (розийаллоҳу анху): “Асмо дин ва ақл эгаси эди”, дейди. Бу икки сифати Асмони нубувват мактабидаги иқтидорли, фазилатли талабага ва ансорий аёллар фақиҳига айлантириди.

Асмо бинти Язид дин ишларини ишонч ва диққат билан ўрганар эди. Ойша онамиз (розийаллоҳу анху) мақтаб: “Ансор аёллари қандай ҳам яхшидир, динни ўрганишда ҳаёлари уларни (масала) сўрашдан тўсиб қолмади”, деганларида Асмо бинти Язид каби аёлларни назарда тутганлари шубҳасиз.

Сахийлик ансорларнинг олий сифати эди. Асмо бинти Язид ривоят қиласиди: «Расулуллоҳ (соллаллоҳу алайҳи ва саллам) уйимизга ташриф буюрганларида: “Бу уйларда қандай яхшилик бор, бу ансорларнинг яхшилигидир”, деб марҳамат қилдилар».

Асмо бинти Язид ана шундай фазилатлари боис Расулуллоҳнинг ҳурматларини қозонди. Ҳудайбиядаги дараҳт остида Асмо Ризвон байъатини берган эди. Расулуллоҳ (соллаллоҳу алайҳи ва саллам): “Дараҳт остида байъат берганлардан ҳеч бири дўзахга кирмайди”, деганлар.

Аллоҳ таоло оқила муҳаддис Асмо бинти Язиддан рози бўлсин. Унинг қабрини нурга тўлдирсин.

“Жаннат башорати

берилган аёллар” китобидан

Юлдуз КОМИЛ қизи
таржимаси

Зайтун бўйи тўрт, етти метрғача борадиган майда баргли дараҳт. Гули оқ, данакли, меваси куз ўртасида етилади.

Зайтун жуда узоқ умр кўради. Сурия ва Фаластинда ҳатто икки минг йиллик зайтунлар учрайди.

Зайтун меваси таркибида юздан ортиқ моддалар, асосан, мой, оқсил, гликозидлар, дармондорилар бор. Зайтун мевасининг мойи кимёвий таркиби жиҳатидан она сутидаги мойга яқин туродиган ягона ўсимликдир. Зайтун мойи табобатда қадимдан кенг ишлатиб келинади. Абу Али ибн Сино бундай ёзади:

«Зайтун ёғи суртилса, оёқ-бўғин хасталиги билан оғригандарга фойда қиласи. Ёввойи зайтун ёғи билан оғиз чайқалса, қонайдиган милкка шифо, қимирлайдиган тишларни мустаҳкам қиласи. Кўзга тушган сув (катаракта) ва оқни кетказади. Ичакнинг бураб оғришига ва гижжаларга қарши ишлатилади. Ялииғи қулуңжда фойда қиласи».

Зайтун мойига саримсоқ ва сабзи қўшиб пиширилса, қоринга сув йигилишида наф беради. Зайтун мойининг куйқаси қуруқ баданларда пайдо бўладиган яраларни битиради.

Зайтун мойи қабзиятда сурги сифатида яхши наф беради. Ўт пуфагидаги тошни нуратиш хусусияти бор. Бунда зайтун ёғи лимон суви билан аралаштирилади.


Фойдали маслаҳатлар

* Зайтун ёғига узум сиркаси аралаштирилса, қўёш таъсиридан, сафро хилти ошиб кети-

шидан ҳосил бўлган бош оғириғига шифо бўлади. Бунда аралашмага латтани ҳўллаб, бошга боғлаш ёки суртиш керак.

* Зайтун ёғини уч маҳалдан ўн беш кун мобайнода томизилса, тиқилмалардан пайдо бўлган кўз касаллиги – катаректага даво бўлиши кузатилган.

* Бўғин, бод касаллигини даволаш учун зайтун ёғидан 200 грамм, тоза керосиндан 200 мл



ва 20 дона аччик қизил қалампир олинади. Қалампир майдаланади ва зайтун ёғи керосинга кўшилади, яхшилаб аралаштирилади. Сўнгра илиқ жойда икки ҳафта сақланади. Сўнг оғриётган жойга суртилади ва жун мато билан ўралади.

* Зайтун ёғига қичитки – газанда ўти қўшиб қайнатилади. Тайёр бўлган қайнатмадан истеъмол қилинса, ичаклар бураб оғришини қолдиради, гижжаларни туширишда фойда беради.

Мирзамир
МИРЗАШАРИПОВ,
доришунос

Ҳорун ЯҲЁ

АЙИҚНИНГ ЖОНИ АСАЛ

Айиқлар асалга ружу қўйгани ҳаммага маълум. Уларнинг жуда катта панжалари бор. Кўриш ва эшишиш қобилияти эса анча сустроқ. У ҳолда асални қандай қилиб топишиди? Албатта, Парвардигор ато этган чўзинчоқ тумшуғи туфайли. Бурни айиқларга озуқани ҳидидан топишга имкон беради. Зоро, Аллоҳ барча мавжудотларнинг эҳтиёжини қондиради.



Айиқлар жуда бесёнақай кўринишга эга эканини биласиз. Аммо уларнинг ташки қиёфасигачув тушманг: аслини олганда, айиқлар жуда чопагон ҳайвон. Улар соатига 48 километр тезликда югурла олади. Улар жуда кучли. Баъзи айиқларнинг бўйи икки-уч метрга етади, улар дараҳт учига чиқиб олиб, у ерда узоқ вақт қолишлари мумкин. Емиш излаб, айиқлар ўттиз метр баландликдаги дараҳтга ҳам чиқа олади.

Бу ширинтомоқлар асалари инини учратса, уни панжаси билан бир неча бор уради ва

арилар фувиллаб ҳар томонга учиб кетади. Сўнг айиқ иннинг ўзидан асални олиб, ея бошлайди. Айиқларни ариларнинг хавфли заҳридан уларга Аллоҳ берган қалин жуни ҳимоялайди.

Айиқлар қишида ухлашини ҳамма билади. Куздаёқ улар уйқуга кетиб, қуруқ ўт ва шоҳ-шабба билан қопланган уйларида баҳор келгунича ухлайди. Аммо қишки уйқуга кетишидан аввал мўл овқат ейди ва кўпроқ тери ости ёғини тўплайди. Бу ёғ уларга бутун уйқуси давомида очдан нобуд бўлмасликка ёрдам беради. Бутун ёз ва куз бошида қорақайин ва каштан дараҳтлари мевасини истеъмол қиласи. Уйқу вақтида айиқларнинг организми териси остида тўпланган захирани астасекин сарфлаб боради ва баҳорда, уйларидан чиққанларида, уларни таниб бўлмайди, ахир улар анча озиб кетади-да. Агар инсон шунча вазнини йўқотадиган бўлса, дармонсизликдан ўша ондаёқ жон берарди.

Уйқу вақтида яна бир муҳим ҳодиса юз беради: кичкина айиқчалар дунёга келади. Урғочи айиқ одатда биттадан учтагача бола туғиши мумкин. Улар кўр, тишлирсиз ва жунсиз ҳолда туғилади. Шунинг учун она айиқ болаларини уйдан чиққан заҳоти ҳимоя қилиши зарур. Йўқса



овчилар ёки бошқа катта айиқлар ожиз айиқчани дарҳол ўлдириши мумкин.

Аллоҳ таоло Ўзининг марҳамати илия яратган барча жондорларини паноҳида асрайди, ҳар бир ҳайвонни қулай яшай олиши учун зарур барча нарсалар билан таъмин этади. Шунинг учун У шундай қилганки, пахмоқ айиқчалар тинч-омон ва бехавотир яшайди. Уларнинг паҳлавон оналари эса, Аллоҳ меҳрибонлиги илия ўз болаларини саир қилдирган чоғида вужудга келадиган хавф-хатардан албатта кўриқлади.

Раҳматуллоҳ ДОНИЁР
таржимаси

